



Yiu a haya mama sin bida den camber



Página 4

- **Comunidad ta reflexiona riba cultura di core bao influencia na Aruba**

Página 3

- **Hulanda: Tasa di femicidio ta baha pero expertonan ta adverti cu peligro ta keda**

Página 8

- **Corte na Hong Kong lo tende argumento di sentencia pa Jimmy Lai**

Página 23

Capitulo di refinaria
cera na Aruba, mientras
region ta mira interes
renoba den petroleo



Página 2

Trump ta e temblor
politico cu ta
sacudiendo Latino
America



Página 10

Israel ta firma pacto
di seguridad cu
Alemania, citando
menasa di Iran



Página 22



Masquerade Nights

DRAWINGS
EVERY
FRIDAY AND
SATURDAY

\$21,000 IN TOTAL PRIZES

WIN CASH | SLOT CREDIT | F&B AND SPA VOUCHERS
WINNERS EVERY HOUR FROM 9:30 PM - 11:30 PM

THE CASINO AT
ST REGIS
ARUBA

Capitulo di refineria cera na Aruba, mientras region ta mira interes renoba den petroleo

Pa casi un siglo, e refineria di petroleo na San Nicolas tabata para como un di e pilarnan economico mas definitivo di Aruba. Construi den añanan 1920 y expandi durante Segundo Guera Mundial, e facilidad a duna forma no solamente na e desaroyo industrial di e isla, sino tambe su tela social, generando empleo, migracion y un sentido di proposito pa generacionnan di Arubiano. Awe, e capitulo ey ta clausurando formalmente - hasta mientras politica regional y global di petroleo ta den fluho atrobe.

Prome minister Mike Eman (AVP) a laga bon cla cu un regreso na refinamento di petroleo na Aruba ta exclui. Den declaracionnan ultimo lunanan, treci dilanti recientemente den medionan local y di Reino, Eman a enfatisa cu e refineria no ta bay reinicia operacion, y cu futuro di Aruba ta den otro industrianan: den desmantela e compleho industrial antiguo, sanea e sitio, y duna otro proposito na e area cu sostenibilidad y diversificacion den mente.

E mensahe a keda reforsa internacionalmente den reportahenan den medionan Hulandes, cu a presenta e clausura di e refineria como definitivo y cu mira pa futuro. Y manera Bon Dia Aruba a publica november ultimo, gobierno di Hulanda ta bay duna asistencia financiero y tecnico na Aruba pa desmantela e refineria y rehabilita e tereno, mientras tambe ta sostene inversion den infraestructura di energia renovable, manera reforsa e red electrico pa acomoda energia solar y di biento.

Domesticamente, e posicion di gobierno a keda presenta como un kiebri necesario cu pasado. E refineria ta inactivo pa años, ta caro pa mantene, malo pa medio ambiente, y tecnologicamente anticua. Intencion anterior pa reanuda operacion di refinamento bao diferente operadornan no a logra duna resultado sostenible. Pa e gobierno actual, reapertura di e refineria no ta solamente economicamente imposible, sino tambe incompatible cu e metanan di desaroyo a largo plaso pa Aruba.

Y toch, mientras e linea di politica di gobierno ta firme, e combersacion mas amplio tocante futuro economico di Aruba - y su posicion den e panorama di energia regional - ta leu di resolvi.

Debate local forma pa historia y vulnerabilidad
Clausura di e refineria ta carga peso politico y emocional particular na San Nicolas, e comunidad cu lasonan mas cercano na e facilidad. Pa decadas, e refineria tabata e motor economico di e ciudad. Su decadencia a contribui na desempleo, reto social y un sentido di abandono cu ningun plan di re-desaroyo a logra resolve completamente. Den e marco aki, e insistencia di gobierno cu refineria no lo bolbe hamas a haya bon acogida entre algun grupo pa su claridad, pero otronan ta cuestion'e, temiendo cu ta rechando oportunidadnan prematuramente den un ambiente global di incertidumbre.

Economia di Aruba ta keda depende demasiado riba turismo, un vulnerabilidad exponi durante e pandemia di Covid-19. A pesar cu e sector a recupera casi completamente, e shock a reforsa preocupacion tocante sobredependencia riba un solo pilar economico. Diversificacion ta un tema recurente den discurso politico, pero alternativanan concreto capaz di match e tamaño y estabilidad antes duna pa e refineria ta slow pa materialisa.

Ta den e contexto aki cu comentarionan di parlamentario Endy Croes (MEP) a drenta e debate, agregando un dimension regional y geopolitico na e discusion local.

Endy Croes y e argumento di Venezuela
Parlamentario Croes a argumenta publicamente cu desaroyonan global - particularmente interes renoba den sector di petroleo di Venezuela - por duna reapertura na oportunidadnan strategico pa Aruba, hasta si refinamento tradicional no ta riba mesa. Croes a nota den un comunicado di prensa cu presidente Mericano, Donald Trump recientemente a reuni cu companianan petrolero internacional mayor, pa discuti reinversion a gran escala den infraestructura petrolero di Venezuela. Croes a bisa cu

companianan manera Chevron, ExxonMobil, ConocoPhillips y Trafigura a expresa interes den inverti decenas di biyones di dollar pa rehabilita e facilidadnan petrolero deteriora di Venezuela y aumenta produccion.

Croes ta presenta e escenario aki como un potencial punto di cambio no solo pa Venezuela, pero pa henter Caribe. Den su opinion, produccion renoba di petroleo Venezolano inevitablemente lo rekeri sosten di infraestructura regional - incluyendo almacenaje, logistica y capacidad di transporte di carga - rolnan cu Aruba y Corsou potencialmente lo por desempeña mirando nan posicion geografico y activonan industrial existente.

E ta argumenta cu Aruba, den su buskeda pa pilar economico nobo, no mester ignora posibilidadnan asina. Hasta si e refineria mes ta obsoleto, Croes ta sugeri cu parti di infraestructura - manera tanki di almacenaje, jetties y facilidad di waf - por haya un proposito nobo pa sostene fluho di energia regional. Pa San Nicolas, esaki lo nifica actividad economico renoba, cupo di trabao, y inversion. Croes a haci un yamado pa un discusion serio, apolitico tocante e rol di Aruba den un panorama regional di energia cambiante, advirtiend cu oportunidadnan asina ta yega un biaha so.

Certeza politico vs flexibilidad strategico
Sinembargo, gobierno a pone un distincion cla entre refinamento y otro forma di uso industrial of logistico. Mientras cu a exclui refinamento categoricamente, autoridadnan no a descarta completamente usonan alternativo di e tereno di e refineria, incluyendo almacenaje, proyecto di energia renovable of otro actividad industrial alineada cu obhetivonan ambiental y economico.

E distincion aki ta crucial. Comentarionan di prome minister Eman ta destina principalmente pa caba cu speculacion tocante un posible regreso na refinamento di petroleo a gran escala - un topico politicamente sensitivo cu a keda aparece repetidamente durante años. For di perspectiva di gobierno, ambigüedad riba e punto aki ta



riesga prolonga incertidumbre, atrasa re-desaroyo, y mina confiansa di inversionista den direcccionnan nobo.

Na mes momento, criticonan ta argumenta cu lenguaje absoluto por limita flexibilidad strategico. Mercadonan di energia global ta notoriamente volatil, forma pa geopolitica, sancion y cambio tecnologico. Sector di petroleo Venezolano, pa largo manca pa mal maneho y restricción internacional, ta keda un di e reservanan proba mas grandi na mundo. Cualier rebibamento significativo lo tin efecto den e region. E pregunta ta keda: Con un economia chikito y abierto manera Aruba mester posiciona su mes memey di incertidumbre asina?

Entre legado y transicion
E debate tocante refineria ta resalta tension mas profundo den e ruta di desaroyo di Aruba. Di un banda, tin un deseo fuerte pa kibra cu industria intensivo di carbon cu ta dañino pa medio ambiente, y linea cu tendencianan global di sostenibilidad. Di otro banda, tin un reconocimiento pragmatico cu transicion ta tuma tempo, capital y fuentenan alternativo di empleo stabiel.

Proyectonan di energia renovable, servicio digital y industrianan niche ta prometedores, pero ainda mester demostra e capacidad di absorbe segmentonan grandi di forza laboral, of genera entrada pa gobierno a gran escala. Pa comunidadnan manera San Nicolas, e gap entre vision y realidad di bida ta keda palpable.

E strategia di gobierno ta enfatisa transformacion a largo plaso: desmantela refineria,

sanea e tereno, y crea espacio pa formanan nobo di actividad economico. Sosten di Hulanda ta reduci un poco di e peso financiero, pero e proceso ta bay ta compleho, caro y slow.

Den e fase transicional aki, voznan manera Croes ta resona precisamente pasobra nan ta papia di ansiedadnan sin resolve, tocante trabao, debe y resiliencia economico. Su comentarionan ta refleha un preocupacion mas amplio cu Aruba por ta cerando porta mas lihe cu ta habriendo porta nobo.

Capitulo cera, pregunta habri Loke ta cla ta cu Aruba a haci un escogencia politico definitivo tocante refinamento di petroleo. E refineria manera e tabata existi antes, no lo bolbe. E decision aki ta marca e fin di un era cu a duna forma na historia y identidad di e isla.

Loke ta keda habri ta con Aruba ta bay nabega e espacio entre legado y futuro, con ta bay diversifica su economia, atende desigualdad regional, y posiciona su mes den un mundo unda politica di energia ta keda cambia. Mientras atencion global ta bay un biaha mas riba petroleo Venezolano y e recalibracion strategico di mercadonan di energia, Aruba ta haya su mes ta mira di cerca, evaluando si y con e desaroyonan aki ta vincula cu su destino bayendo dilanti.

Pa awo, e capitulo di refineria ta cera. Pero e storia di kico ta bin awo - pa San Nicolas, pa economia di Aruba, y pa su rol den e region - ainda ta siendo redacta.

Comunidad ta reflexiona riba cultura di core bao influencia na Aruba

Den ultimo simannan, accidentenan den trafico cu consecuencia serio y hasta fatal, cu ta involucra uso di alcohol, a causa conmocion den comunidad local. En particular, dos caso di hit and run, uno na Oranjestad y otro na San Nicolas, a pone ciudadanonan reflexiona tocante e cultura di core bao influencia na Aruba.

Un di e sucesonan mas tragico y impactante e luna aki a sucede durante e prome siman di 2026, na momento cu un pareha a perde nan bida den un hit and run diadomingo 4 di januari riba L.G. Smith Boulevard.



E caso aki, den cual e sospechoso C. Fernandes, coriendo den un auto SUV color preto na un velocidad extremadamente halto, a trapa un pareha y core bay sin stop, lagando nan atras, a causa un conmocion enorme. No solamente pa e manera horibel den cual e pareha a perde nan bida mientras nan tabata crusa riba zebread, sino pa e hecho cu e chauffeur, cu segun medionan local tabata core bao influencia, a bandona e sitio sin ni sikiera stop un rato pa mira kico el a causa.

Na e sitio, dokter forensico a constata morto di e pareha: Josely Paulina Vasquez Gonzalez naci riba 09-07-1960 na Republica Dominicana y Carlos David Vialez Valerio naci riba 19-10-1971 na Republica Dominicana, prome y di dos morto den trafico pa aña 2026.

E hecho cu e chauffeur a bandona e sitio despues di e accidente a causa indignacion y tristesa adicional.

Mas traumatico ainda tabata e hecho cu yiu muher di un di e victimanan, Yhoely Willems tabata testigo di e suceso. Den un entrevista cu Bon Dia Aruba, el a bisa cu “mi ta corda cu mi a sinti mi casa a rek mi y despues di esey ora mi a bira wak, mi mama y mi stiefvader tabata benta riba caminda caba.”

Ruman homber di Yhoely Willems, Edwin Willems, tambe ta experienciando un tristesa enorme cu no tin spliacion. Edwin awo ta organisando un campaña pa sigura cu tin husticia den e caso di morto di su mama y su stiefvader. Esaki pasobra den

comunidad local ta reina e sentimiento cu casonan asina, di morto den trafico causa pa irresponsabilidad, hopi biaha no ta haya un castigo husto.

Riba rednan social, Edwin Willems a haci un yamado pa pueblo uni pa busca husticia “no solamente pa mi mama y su casa, sino pa tur victimanan y famianan cu a pasa locual nos ta pasando.” Hunto cu su post, el a inclui un cantidad di caso di morto den trafico, mustrando cu hopi biaha, consumo di alcohol y coremento bao influencia ta involucra, y alabes, cu hopi biaha e castigo cu ta duna na e chauffeur cu tabata core bao influencia ta demasiado abao.

Esaki a cuminsa un combersacion entre usuarioan riba un tema cu ta birando un urgencia na nivel nacional y cu mester haya atencion debido. “Tristo cu no tin castigo drechi na Aruba,” S.T. a comenta. “Hit and run ta mescos cu intento di asesinato. Y si e victima fayece e ta conta mescos cu asesinato. Mester baha man pisa riba e casonan aki.” El a haci alabes algun sugerencia di e castigonan cu lo considera adecuado pa e crimennan aki. “Si haya hende ta core bebi, boet nan y kita nan rijbewijs pa minimo 6 luna. Exigi nan test cu nan ta limpi di alcohol/droga prome nan hay’e back. Door di e castigonan ridiculo cu tin aki, hende ta sigui haci y deshaci den trafico.”

Patronchi persistente den trafico

Durante ultimo cinco aña, cifranan di fatalidad den trafico a varia, pero e causanan subyacente tras di accidente mortal a mostra un continuidad notable. Datonan di

Ministerio Publico (OM) y reportahenan den medionan local ta punta ripitidamente riba coremento bao influencia y comportamiento di hit & run como problemanan persistente y sin resolve riba camindanan di nos isla.

Na 2021, Aruba a registra al menos siete fatalidad den trafico, segun jaarverslag di OM, cu reportahenan di medionan local confirmando varios accidente mortal involucrando tanto motorista como usuarioan vulnerable di caminda. Loke a haci 2021 particularmente notable for di perspectiva di husticia tabata e visibilidad explicito di ofensa di hit & run den datonan di OM.

E aña en cuestion, OM a registra 119 caso di “wegrijden na veroorzaken ongeval” (bandona e sitio despues di causa un accidente - un cifra remarcablemente halto pa un isla chikito. Na mes momento, a registra 285 caso di DUI. Hunto, e cifranan aki ya a sugeri cu coremento peligroso no tabata limita na eronan momentario, sino hopi biaha tabata trata di decisionnan criminal despues di e hecho - manera huy di e sitio pa evita responsabilidad of test di alcohol.

E situacion a mira un deterioro skerpi na 2022. Aruba a cera aña cu 14 morto den trafico, e cantidad anual mas halto den e periodo di cinco aña. Cifranan di OM ta muestra 395 caso di core bao influencia, un aumento significativo compara cu 2021.

Maske OM no a publica un total di hit and run riba su mes pa 2022 manera a haci e aña prome, cobertura mediatico di accidente falta ripitidamente a menciona chauffeurnan bandonando e sitio,

sospecho di intoxicacion, of tur dos. E combinacion di un cantidad halto di morto y aumento di cifranan di castigo pa core bao influencia a agrava e preocupacion publico cu comportamiento di coremento irresponsable tabata birando mas prevalente en bes di incidental.

Na 2023, e cantidad di morto a baha na 9, ofreciendo un sentido temporal di alivio. Sinembargo, datonan di OM a mostra cu e cantidad di caso di coremento bao influencia a aumenta na 509, e cantidad mas halto registra den e periodo di 5 aña.

E divergencia aki - menos morto pero mas caso di coremento bao influencia - ta sugeri cu accion di polis por a mehora deteccion sin produci un cambio structural den comportamiento. Accidente fatal na 2023 a continua involucrando motociclista, peaton y incidente anochi laat, y al menos un caso a ser investiga como un hit and run, subrayando cu e mesun patronchi di riesgo a persisti, a pesar di e cantidad mas abao di morto.

Pero cualkier optimismo genera na 2023 no a dura mucho largo. Na 2024, Aruba a registra 13 morto den trafico, casi back na e peak di 2022. Fuentenan di gobierno y medionan di comunicacion explicitamente a vincula e aumento aki na velocidad halto, uso di alcohol y un aumento den incidente di hit and run, incluyendo casonan fatal unda e chauffeur a laga e victimanan atras.

Maske e tabelnan publico di OM pa 2024 no a presenta cifranan di coremento bao influencia mesun detaya cu

añanan anterior, e narrativa di autoridadnan tabata consistente: comportamiento di coremento peligroso tabata empeorando, no stabilizando. Accidente fin di aña, incluyendo morto di peaton y accidente frontal, a resalta e vulnerabilidad di usuarioan di caminda ora alcohol y irresponsabilidad ta topa otro. Pa fin di 2025, Aruba a registra 10 morto den trafico, segun reportahenan citando oficialnan di husticia y polis. Bon Dia Aruba a documenta varios di e incidentenan aki durante e aña, incluyendo e di seis morto den trafico, y reportahenan subsecuente a punta riba un cantidad total mas halto ainda.

Mientras datonan di OM pa ofensa di hit and run y coremento bao influencia durante 2025 ainda no ta disponible, e incidentenan fatal riba nan mes ta refleha patronchinan familiar: accidente di motocycle, morto di peaton, y casonan unda e chauffeur inicialmente ta bandona e sitio. E ausencia di data oficial di fin di aña no ta tapa a realidad mas amplio: e comportamentonan cu a crea fatalidadnan na comienso di e decada a keda presente.

Durante periodo di cinco aña di 2021 te 2025, Aruba a registra mas di 50 fatalidad den trafico, cu casonan di coremento bao influencia aumentando notablemente entre 2021 y 2023, y comportamiento di hit and run ripitidamente presente den datonan oficial y reportahe di suceso.

Loke ta resalta ta no solamente e cantidad di morto, sino e consistencia di e factornan di riesgo. Coremento bao influencia di alcohol a keda prevalente a pesar di accionnan di polis, mientras e disponibilidad di e chauffeurnan pa bandona escena di accidente ta punta riba un problema mas profundo di evasion di responsabilidad y disuasion.

Pa legisladornan y agentenan di ley, e ultimo cinco aña ta sugeri cu morto den trafico na Aruba ta resultado di patronchinan di comportamiento cu a proba di ta resistente pa intervencionnan a corto plaso. Pa e motibo aki, comunidad ta exigiendo un cambio urgente den procesamiento, enhuiciamento y castigo di e casonan aki.

Proyecto Shoco Wellness tin seis aña den ehecucion “Sosten pa salud mental ta crucial”

Ansiedad, miedo, falta di confianza, pero tambe trauma personal por stroba un estudiante di completa su estudio. Esaki tambe ta motibo pakico lider di e proyecto Shoco Wellness, esta dr. Juliet Chiew ta contento di mira con hopi ta haci uso di e servicionan pa ayudo mental.



Shoco Wellness ta un proyecto di salud mental y bienestar financia pa e fondo di estímulo di OCW, cu ta e Ministerio di Enseñansa, Cultura y Ciencia di Hulanda, dirigi pa studiantenan y miembronan di staff na Universidad di Aruba (UA), Instituto Pedagógico Arubano (IPA), y Enseñansa Profesional Intermedio (EPI). Oficina di Shoco Wellness ta ubica na edificio di UA, cu un total di 13 psicologo local y internacional cu ta brinda un servicio unico na bienestar di e gruponan menciona. Ta trata aki di terapistanan profesional cu ta ofrece nan apoyo na un prijs hopi reduci pa asina sigura exito di un programa, cu segun datonan anecdotal, ta traha. “Pero, awor mester percura pa datonan concreto,” e lider di proyecto, dr. Chiew a bisa Bon Dia Aruba. Pa tal motibo mes, e ta spera di por ehecuta un investigacion riba e correlacion entre e servicionan di Shoco Wellness y exito den estudio, of ehecucion di trabao.

Pero aunke cu esakinan ta datonan importante pa asina sigura cu por prueba cu un proyecto di sosten pa salud mental y bienestar ta esencial,

ya caba e ta convenci cu Shoco Wellness ta haci diferencia den bida di studiantenan y staff di e tres institucion. “Na comienzo, na 2019, Shoco Wellness tabata algo nobo. Tabata e propio conseheronan di estudiante cu tabata avisa studiantenan di e proyecto. Pero den dos aña nos tin como 70 estudiante ta aplica, pa aña.” A ripara cu na comienzo, nos tabata haya hopi peticion for di studiantenan cu ta cuminsa nan trayectoria di estudio. Awor, hopi di nan, drentando sea nan periodo di stage, of skirbimento di nan tesis, ta bolbe acerca pa ayudo, Chiew a conta.

Dr. Chiew ta splica cu e modelo cu e proyecto ta usa ta inclui bienestar na un banda y angustia na e otro. Ta usa e color berde pa indica ora un persona ta floreciendo, cu ta indica un nivel halto di bienestar mental y social. E otro banda ta e zona geel, cu ta indica nivelnan abao di bienestar y angustia limita y temporal. Pero tambe ta tene cuenta cu e zona oranje cu ta indica un lucha continuo y zona cora cu ta indicacion di

un persona cu ta tambaleando cu mester di ayudo urgente.

Y e ayudo ta inclui cinco sesion individual cu un terapeuta profesional. Den comienzo, e sesionnan individual tabata tres, pero e terapistanan a indica cu esaki no tabata suficiente y asina a amplia e cantidad na cinco. Motibo ta cu hopi biaha, particularmente si ta papia di trauma for di mucha y abuso, ta manera cu ta habri un ‘pandora box,’ y mester brinda mas guia. Aki ta unda e terapeuta tin e opcion pa pidi pa e opcion pa otro cinco sesion. Y si e terapeuta ta considera cu mester mas, e tin e opcion pa amplia e sesion individual cu otro cinco biaha. “E psicologonan ta hopi comprometi y ta bisa di ta gusta pa traha pa e poblacion di studiantenan pasobra ta hendenan cu ta haci nan ‘huiswerk.’”

Den caso cu ta necesario ta expande e sesion cu famianan, dependiendo e contexto, pa asina brinda un sosten amplio. “Mi ta hopi agradecido na tur e terapistanan, e psicologo den e red aki. Nan



ta fabuloso. Nos mester mas psicologo riba e isla, idealmente na tur scol.” Es mas, Chiew cu tabata encarga cu Cuido di Calidad na Universidad di Aruba tabata tende di e propio docentenan pa hopi tempo cu nan ta kere cu mester di psicologo pa e studiantenan, cu tabata expresa nan preocupacionnan cu persona cu no ta psicologo y no tin e capacidad pa yuda den casonan cu no ta di trata di e estudio mes. E momento cu studiantenan a cuminsa expresa nan pensamentonan riba papel di examen tabata indicacion cu mester tuma accion. Chiew for di su fun-

cion di Cuido di Calidad a prepara un encuesta na 2018 pa por determina e ‘status’ di e studiantenan. Asina a bin e proyecto Shoco Wellness cu a haya e financiamiento di OCW.

Analisis

Na e momentonan aki, docentenan di UA, IPA y EPI ta indica e impacto di Shoco Wellness riba resultadonan academico, pero Chiew a bisa cu esey no ta suficiente. Como tal, e organizacion mes ta preparando un encuesta pa por midi e impacto. “E unico mi por bisa ta cu aplicacionnan a subi y cu tin estudiante cu ta ripiti.”

Salud Mental

Segun Juliet Chiew, e paso pa busca ayudo psicologico no ta un paso cu na Aruba ta tuma sin mas. E ta un proceso cu a tuma tempo, pa hende realiza cu salud mental ta importante. Antes tabata bay dokter cu tabata esun cu tabata prescribi pa bay psicologico. Pero awor cu mas conscientisacion, hende ta realiza cu keda sin drumi, ta tristo, tin dolor den curazon cu no por describi, ta rekeri ayudo psicologico. “Nos ta yegando na un punto, cu tin un reconocimiento mas amplio cu salud mental ta hopi importante.”

Bon Dia Aruba lo amplia riba e mision di Shoco Wellness y su impacto den un siguiente edicion.

Yiu a haya mama sin bida den camber



Diadomingo merdia a surgi un caso lamentable na Santa Cruz unda a reporta cu a haya un persona sin bida den cas. Mesora polis y ambulance a sali cu maximo urgencia.

Empleadonan di ambulance a topa cu un señora den su 40 añanan sin bida den camber.

Na yegada di polis, a tuma contacto cu recherche pa notifik’e di e situacion.

A yama dokter forensico tambe y na su yegada a constata e morto di Sra. Mairi Naranjo. Tambe a constata cu aki tabata trata di un morto natural.

Segun otro medionan ta reporta, e señora lo por a consumi un cantidad grandi di substancia cual por a resulta den atake di

curason.

Di e caso lamentable aki a bin compronde cu tabata e yiu homber di e señora cu a lanta bay den camber pa lanta su mama. Aki el a nota cu no tabatin reaccion y mesora a bati alarma.

E suceso aki a yega como sorpresa, como cu a compronde, Mairi tabata activo y den bon spirito e anochi anterior.

Manera e reporta, Mairi tabata un persona conoci riba Facebook y un persona sumamente agradable.

Bon Dia Aruba ta duna palabranan di condolencia na e famia di Mairi.

Potret obteni for di Facebook.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figueroa (closer editor)
Leo Maduro
Dilma Arends
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com
Mark Gomes
mark.gomes@cspnv.com

Aviso y Arte

Sandra Loefstop

Lisa Tromp

Departamento Digital

Juan Luis Pinto

Administracion
accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Dirksz

Colaboracion

Associated Press
Ret Karibense
Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800
Email: noticia@bondia.com
aviso@bondia.com
info@bondia.com
Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant redacta y imprimi na Aruba y ta obenibel di dialuna te cu diasabra. Ningun contenido por wordo reproduci sin permiso di editor.

Dominicanonan un biaha mas afecta pa tragedia

Algun dia atras a reporta cu un candela na San Nicolas a destrui un cas por completo, sinembargo a resulta cu e victimanan den e caso aki ta un famia Dominicano, kendenan awo a keda sin hogar.

E famia a perde nan cas di aranson despues cu un candela a destrui nan csa por completo. E residente Emiliano Paredes-Garcia, originalmente for di Republica Dominicana, a perde tur su pertenencianan.

El a declara cu e tabata drumi ora cu huma a lant'e mainta trempan. Na momento di investiga di unda e ta bin, su cas ya caba tabata na candela, lagando e famia sin paña, mueble of shelter.

Un miembro di Parlamento, ken ta conocido di e famia, a presenta na e escena y a yama trahado social pa asisti esnan afecta y na mes momento a apela na comunidad pa yuda e famia, ken ta den necesidad urgente pa paña, cuminda y vivienda temporario entre otro.

Esaki ta marca otro incidente den e ambiente continuo recientemente unda e comuni-



dad Dominicano ta mirando su mes afecta den rango amplio di tragedianan y incidentenan mortal.

Manera nos a menciona den edicionnan anterior di Bon Dia Aruba, e situacion a desaroya di tal manera cu e ta hayando atencion na Republica Dominicana y entre e diaspora Dominicano.

Berdad e situacionnan aki ta algo cu por pasa cualkiera, sinembargo e cadena di co-incidencia den poco tempo



cuminsando cu e asesinato di Luz Divina Paulina, e hit & run mortal unda Josely Paulina Vasquez Gonzalez y Carlos David Viala Valerio a perde nan bida, e perdida di Ronal Heredia-Heredia den accidente di trafico y awo e famia aki perdiendo tur su

pertenencianan y hogar, ta un fuente di preocupacion amplio y profundo continuo den e comunidad di Dominicanonan tanto aki na Aruba como na Republica Dominicana y e diaspora Dominicano.

Minister Dowers a critica estado di warda di polis na Shaba

Durante un bishita na e warda di polis en cuestion, e mandatario encarga cu Husticia Arthur Dowers, a tuma nota cu e edificio y tereno alrededor di e warda tin un falta severo di mantenimiento. Segun e mandatario, e condicionnan aki ta crea un ambiente di trabao cu no ta higienico pa e personal.

Dowers a haci e bishita dia 8 di januari cu atencion di Inspector Raquel Ras. Durante e bishita aki, el a papia cu e empleadonan di departamento di investigacion criminal y unidad di narcotico, entre otro, ademas di inspecciona unda e celnan ta. E minister pa papia brevemente cu algun detenido tambe cu tabata pafo durante nan ora di sali.

Segun informacionnan den medio local, loke tabata particularmente impactante ta e cantidad di vehiculo, bicicleta, entre otro, cu confisca cu ta warda na e sitio. Segun e mandatario, esaki ta un factor

cu ta contribui na contaminacion y ta crea un ambiente cu no ta sanitario y no ta safe pa e oficialnan cu ta traha aki diariamente.

E minister a expresa tambe cu e ta desapunta cu e estado den cual e stacion di polis ta y a expresa cu ta inaceptable pa un edificio publico cu un funcion social asina importante ta victima di negligencia di tal grado.

Segun su persona, ambos e edificio y e tereno ta den mal condicion, cu crecimiento di yerba y e presencia di materialnan innecesario.

E situacion aki no ta unico di e warda di polis na Shaba, sino un moda cu ta mira na varios edificio rond di Aruba. Anteriormente caba, e mesun mandatario a bishita edificio cu tabata bao uso di ministerio di Husticia y awo ta bandonado, cu ta completamente tuma over pa adictonan ambulante y ta yen di deterioro y contaminacion. Di mesun



manera e edificio unda departamento di rijbewijs ta opera, cu tambe ta den condicionnan precario y no ta apto como un sitio unda empleadonan ta traha diariamente.

Ademas di reconocimiento y bishita, e situacion cu e edificacionnan aki ta enfrenta mester di cambio concreto y solucion inmediato.

Parlamentario Rocco Tjon (MEP):

Atende cu suicidio y prevencion ta pidi accion y no excuus



Ultimo tempo, Aruba ta ser confronta cada biaha mas cu noticia tocante suicidio y intencionan di suicidio. Tras di cada caso tin sufrimento profundo y famianan cu ta keda atras

cu hopi pregunta. Esaki por a ser evita? E crecimiento y visibilidad di e casonan tragico aki ta muestra un desaroyo preocupante cu no por ser ignora.

Suicidio ta un reto social. Salud mental, presion social y acceso na ayudo ta hunga un rol central. P'esey mes, ta na gobierno, y especificamente e minister encarga cu Salud Publico, tin un responsabi-

lidad grandi. Prevencion, señala trempan y capacidad suficiente den e sector di salud mental mester ta prioridad.

Gobierno no a aloca mas fondo pa atende salud mental

Ora nos tene esaki na cuenta e ta lamentabel y alarmante cu minister Mervin Wyatt Ras a indica cu no lo pone recurso adicional pa e sector aki, y den presupuesto 2025 y 2026, mocionnan pa aloca mas fondo pa e sector aki a ser desaproba pa fraccionnan cu ta sostene Gobierno.

Cua maneho y programa minister Wyatt Ras a introduci

E posicion aki no ta cuadra cu e señalnan creciente for di comunidad y cu e presion ya conoci riba e sector aki y su profesionalnan. Reconoce un problema sin inverti no ta un solucion. E situacion ta lanta mas pregunta ora nos wak e

pasado politico di e minister. Ora e tabata parlamentario, e tabata un critico fuerte di e maneho pa atende cu salud mental y el a declara cu e tin tur solucion. Awor cu e tin responsabilidad ehecutivo, e mester indica kico concretamente e a cambia pa atende cu e situacion actual.

Preguntanan na e mandatario

Pa e motibo aki tin 40 pregunta a ser haci na e mandatario. Especialmente dirigi na e accion concreto di e minister desde cu e a drenta den funcion. Cua medida a ser tuma? Cua iniciativa nobo a ser lansa? Cuanto fondo adicional a ser aloca?

Nota di Redaccion: E articulo aki ta opinion di e autor y no ta representa opinion di Bon Dia Aruba.

Minister Geoffrey Wever ta introduci Startersregeling pa stimula empresanan nobo

Den cuadro di un strategia pa stimula empresanan nobo y diversificacion di Aruba su economia Minister di finanzas, Economia y Sector Primario, Geoffrey Wever (Futuro) ta introduci oficialmente un "Startersregeling" pa companianan nobo, dirigi na elimina barrera fiscal pa empresanan nobo y crea un clima fiscal mas faborabel pa empresanan nobo.

Minister Wever, den un comunicado di prensa, ta subraya cu e "Startersregeling" ta forma parti di e vision economico di Gobierno AVP-FUTURO, cu e meta pa stimula incorporacion di empresanan nobo den specialmente e Promising Sectors, manera defini pa Directie Economische Zaken, Handel en Industrie (DEZHI), pa stimula entrepreneurship, pa crea cuponan di trabao nobo y innovativo y pa crea entranan nobo pa Gobierno.

E "Startersregeling" ta aplicabel especificamente pa empresanan nobo den e Promising Sectors, cu ta entre otro turismo cultural, turismo deportivo, economia di conocimiento manera energia

solar, tecnologia oceanico, educacion superior, ICT y FinTech y solucionnan insular orienta riba exportacion; logistica maritimo y di aviacion; economia agricola cu produccion local di alimento; economia circular cu enfoke riba reciclahe, waste-to-energy y deep seawater industries; y industria creativo manera arte, musica, diseño grafico, fotografia, web design, art studios y moda. "Cu e enfoque aki, Gobierno AVP-FUTURO ta pone pasonan concreto pa diversifica economia di Aruba", segun Minister Geoffrey Wever.

Pa apoya empresanan den nan fase inicial, e areglo ta introduci un serie di incentivanan fiscal concreto durante e prome cinco aña despues di fundacion. Entre esaki ta un excepcion anual di ganashi te na Afl. 50.000, un deducccion di inversion aumenta te 20%, y un deducibilidad parcial di e montante principal di prestamonan comercial nobo. Tambe a crea flexibilidad den e rekisito di salario pa accionistanan cu tin participacion substancial y cu ta traha den nan mesun compania, basando esaki riba salario minimo legal. Den e periodo di start-up e areglo di



empresario chikito pa BBO, AZV y BAVP ta wordo aplica durante e periodo e compania nobo no mester paga BBO, AZV y BAVP pa 5 aña. "E combinacion di e medidanan aki ta contribui directamente na mehora di liquidez, acceso na financiamiento y reinversion continuo", segun Minister Wever.

E "Startersregeling" ta aplicabel solamente pa companianan cu ta funda y cu ta establece na Aruba desde 1 di januari 2026 y cu tin un permiso

di negoshi actividadnan den e Promising sectors. Empresanan cu ta participa mester demostra cada aña cu nan ta inverti minimo 15% di nan bruto-omzet den crecimiento di e empresa, cu nan tin un nivel minimo di empleo di acuerdo cu nan volumen di actividad, y cu nan ta cumpli cu rekisito di presencia economico real na Aruba.

"Cu introduccion di e "Startersregeling", Gobierno di Aruba ta haci un inversion consciente pa diversifica eco-

nomia di Aruba, un maneho ta refleha un balansa claro entre estimulacion di iniciativa empresarial y beneficianan fiscal, cu como obhetivo final un economia mas diversifica, mas innovador y mas resiliente. E "Startersregeling" a drenta na vigor riba 1 di januari 2026 y ta marca un paso importante den e caminda pa crea un economia mas fuerte pa Aruba cu ta prepara pa futuro", segun Minister Geoffrey Wever.

Actividad di keintura ta aumenta na Merca cu al menos 15 miyon caso registra, segun CDC

(ABCNews)—Actividad di keintura na Merca ta keda halto, unda muchanan ta ser afecta mas, segun datonan publica recien for di e Centro di Control y Prevencion di Malesa na Merca (CDC).

CDC a calcula diabierna cu tin al menos 15 miyon enfermedad, 180.000 hospitalisacion y 7.400 morto di keintura te awor e temporada aki. E agencia federal a reporta cu actualmente tin un grado halto di muchanan bayendo dokter pa sintomanan di keintura.

Mas cu 18% di bishita na dokter pa muchanan bao cuatro aña tabata relaciona cu keintura, cual ta e nivel mas halto cu a mira desde al menos 2016, CDC a nota. “Mi par siman ta mira e datonan dreña, y mi ta preocupa pa e muchanan chikito y con malo nan ta bira,” segun Dr. Anne Zink, ken ta un dokter di medicina pa emergencia y ta encarga cu e plataforma PopHIVE cu ta rastrea con enfermedadnan respiratorio ta plama, a conta ABC News diabierna.

Casi 7,2% di bishita cerca un proveedor di cuido a ser cat-

egorisa como enfermedadnan manera keintura y ta keda un record pa e temporada di aña aki, manera e datonan di CDC ta mostra. Enfermedadnan manera keintura ta conta pa pashentnan cu tin keintura y tosamento of dolor di garganta.

A reporta ocho morto relaciona cu keintura pediatrico e siman aki, treciendo e total pa 17 e temporada aki, segun un conteo haci pa ABC News. E temporada pasa tabatin 289 mucha cu a muri di keintura—e cifra mas halto registra na CDC desde cu el a cuminsa rastrea na 2004. Casi 90% di muchanan cu a muri di keintura aña pasa no tabata vacuna, un estudio di CDC a descubri.

Datonan di CDC ta mostra cu 26 estado Mericano ta mirando “nivelnan hopi halto” di enfermedadnan parecido keintura mientras cu 16 estado ta mirando “nivelnan halto”.

Ademas, demanda pa medicina pa keintura y gripe como tambe testnan di COVID pa cas a aumenta 155% durante e ultimo tres siman, segun datonan comparti cu ABC News pa cadena boticario

Walgreens.

Recien, un epidemiologo top na CDC a conta ABC News cu actividad di keintura por sigui crece den Merca durante e proximo par siman. “Tin hopi influenza bayendo rond awor,” Dr. Carrie Reed, hefe di e sector di epidemiologo y prevencion pa e division di influenza na CDC, a conta ABC News na comienso di siman pasa.

“Frecuentemente nos ta mira actividad continuando den temporada di primavera...mi ta kere e realidad ta cu e ta bay keda halto pa un rato mas,” el a continua.

Datonan ta mostra cu mayoria caso di e temporada aki ta conecta cu un variante di keintura nobo yama subclade K—un variante di e virus H3N2, cual ta un subtipo di influenza A.

Subclade K ta circulando desde verano den otro paisnan y tabata un factor principal di un aumento skerpi den casonan di keintura na Canada, Hapon y Reino Uni. Dokternan ta encurasha tur Mericano di seis luna di edad bay ariba pa haya nan vacuna anual di keintura. Nan ta enfatisa cu e inyeccion ta pro-



tege contra malesa severo, hospitalisacion y morto.

malesanan serio.

Desde 27 di december, 43,5% di adultonan Mericano y 42,5% di muchanan a ricibi un vacuna di keintura, segun datonan di CDC. Recien, e agencia a cambia e cronograma di inmunisacion infantil. No ta recomendando e vacuna contra keintura mas pa mucha y adolescentenan, encurashando mayornan pa papia cu nan dokter tocante vacuna.

Investigacion a mostra cu e inyeccion anual no ta perfectamente adecua cu e variante nobo pero asina mes ta provee proteccion contra

Ta parce cu actividad den algun parti di e pais ta stabilizando compara cu e siman anterior, CDC a nota, pero e agencia ta adverti cu esaki por ta debi na menos hende bishitando dokter durante temporada di fiesta.

“Nos no ta completamente liber di peligro ainda. Temporada di keintura ta imprevisible, y e virus ta sigui circula na nivelnan hopi halto,” segun Dr. Michelle Morse, e comisario interino di salud na New York, a bisa durante un conferencia di prensa diahuebs.

Alemania ta critica declaracion di RFK Jr. cu gobierno ta persigui dokternan pa exencion di vacuna



(AP)—Gobierno Aleman a rechasa fuertemente e acusacionnan di Secretario di Salud Mericano Robert F. Kennedy Jr. cu e nacion ta limitando autonomia di pashentnan, specialmente durante e pandemia di COVID-19.

“Declaracionnan haci pa e Secretario di Salud Mericano no tin base,

ta factualmente incorrecto y mester ser rechasa,” segun minister di Salud Aleman Nina Warken a bisa den un declaracion diasabra.

Kennedy a bisa den un video publica mas trempa cu el a manda e minister Aleman un carta basa riba reportahenan saliendo for di Alemania cu gobierno tabata “limitando e capacidad di hende pa actua riba nan mesun

escogencia ora nan mester tuma decisionnan medico.”

E secretario Mericano a bisa cu “Mi a haya sa cu mas cu mil dokternan Aleman y miles di nan pashent ta enfrenta persecucion y castigo pa emitiendo exencion di bisti mascara of haya vacuna di COVID-19 durante e pandemia.”

Warken a rechasa Kennedy su declaracionnan, bisando cu “durante e pandemia di coronavirus, nunca tabatin obligacion riba e profesion medico pa administra vacunanan di COVID-19. Cualquier persona cu no kier a ofrece vacunacion pa motibonan medico, etico of personal no tabata vulnerable pa persecucion, y tampoco lo mester tin miedo pa sancion.”

Kennedy no a duna ehempelnan especifica ni a bisa na cual reportahe e tabata referiendo pero a agrega cu “den mi carta, mi a splica cu Alemania ta poniendo blanco riba dokternan cu ta pone nan pashentnan prome y ta castigando ciudadanonan pa tuma nan mesun decisionnan medico.” El a conclui cu “gobierno Aleman ta

violando e relacion sagrado di dokter y pashent, y reemplasando e ta un sistema peligroso cu ta haci dokternan aplicadornan di politica estatal.”

Kennedy a bisa cu den su carta el a hacie cla cu “Alemania tin e oportunidad y e responsabilidad pa corigir e trayectoria aki, pa restaura autonomia medico, pa caba cu persecucionnan politicamente motiva.”

Warken a nota cu no tin prohibicionnan profesional of multa pa no haya vacuna. “A haci persecucion criminal solamente den casonan di fraude y falsificacion di documento, manera emiti certificado falso di vacuna of di mascara,” e minister a bisa. Tambe el a clarifica cu en general na Alemania “pashentnan tambe ta liber pa dicidi cua terapia nan kier haya.”

Mientras cu mayoria Aleman tabata dispuesto pa haya vacuna contra e virus di COVID-19 durante e pandemia, tambe tabatin protesta pa un minoria chikito di skepticnan di vacuna den e pais cual tin biaha a haya sosten di movementonan ultra-derechista.

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



CBCS ta sigui cu caso di recuperacion na Ennia a pesar di fayecimento di Ansary

(CuraçaoChronicle) - Banco Central di Corsou y Sint Maarten (CBCS) lo sigui cu e esfuersonan pa recupera e perdidanan cu a sufri cu seguro Ennia a pesar di e fayecimento di su ex propietario Hushang Ansary.

Gemeenschappelijk Hof van Justitie a temporalmente suspende e proceso contra Ansar despues di ricibi notificacion di su fayecimento, sinembargo e caso en general te ainda

ta activo.

Ansary, un ex negociante naci na Irani y ex propietario di Ennia, a fayece recientemente. Su consehero legal a informa corte formalmente di su morto, causando e suspension di e proceso te ora cu obtene claridad tocante ken lo asumi su posicion legla como sucesor of representante. Na momento cu esaki keda resolvi, e caso ta anticipa di sigui den cort.e

CBCS a enfatisa cu e fayeci-



mento di Ansary no ta trece un fin na e proceso legal amplio alrededor di Ennia. E proceso di responsabilidad ta

extende mas aleu cu Ansary personalmente y ta inclui otro acusadonan, entre nan e entidadnan legal conecta na

su persona. E partidonan aki ta keda completamente bao e acusacionnan andando.

Decisionnan di corte anterior na Corsou a duna orden na Ansary di paga mas cu 500 miyon euro na Ennia, un decision cu a marca un victoria legal grandi pa CBCS y e seguradonan afecta. Sinembargo, e recuperacion di e fondonan aki a keda compleho, involucrando accionnan legal cu ta crusa frontera y varios hurisdiccion.

Procurador General ta conseha Corte Supremo anula decision tocante atraso di huur di FKP

(CuraçaoChronicle) - Procurador General di Corte Supremo di Hulanda a conseha pa anula un decision di Gemeenschappelijk Hof van Justitie tocante atraso den pago di huur cu ta involucra e personanan bibando den casnan di Fundashon Kas Popular (FKP).

E Procurador ta recomenda pa e caso referi back na Gemeenschappelijk Hof van Justitie pa un evaluacion nobo, segun e opinion cu el a duna e siman aki.

E conclusion aki ta enfoca riba e pregunta legal di e corte

a maneha di manera apropia e huurnan cu ta debe. Segun e procurador, corte no a splica di manera suficiente con e statuut di limitacion pa e declaracionnan individual - conoci como e defensa di limitacion - mester ta aplica den e caso aki. El a declara cu esaki ta un elemento crucial di esnan concerni su proteccion legal y ta rekeri examinacion mas detaya di e corte.

E caso ta trata atraso substancial di huur entre esnan bibando den casnan maneha pa FKP na Corsou. Den un decision di apelacion anterior, e corte a determina cu esnan cu atraso significativo ta



rekeri cumpli condicionnan estrict prome cu por anula e debenan. E condicionnan aki ta inclui haci areglonan di pago adicional y otorga autorisacion pa coleccion di debe.

E Procurador awo ta conseha

Corte Supremo di Hulanda anula e decision aki y manda e caso back pa e corte. Como resultado, e corte di apelacion su decision te ainda no ta final. E Procurador su opinion ta un conseho y no tin peso; Corte Supremo por tuma e

decision di scoge si lo sigui esaki of rechasa esaki of yega na un conclusion completamente diferente.

E decision bao evaluacion ta un di e varios caso relaciona cu atraso di huur na FKP. E fundacion di vivienda ta maneha miles di unidad di cas social na Corsou y ta enfrentando un problema di pago amplio.

Te ainda no ta conoci ki ora Corte Supremo lo tuma su decision. E resultado por tin implicacion pa casonan similar di FKP den cual tambe ta trata atraso di debe.

Hulanda: Tasa di femicidio ta baha pero expertonan ta adverti cu peligro ta keda

(NLTimes) - E cantidad di hende muhe asesina na Hulanda a disminui aña pasa, sinembargo expertonan ta adverti cu te ainda ta demasiado trempan pa papia di un disminucion amplio den violencia contra hende muhe.

Un total di 37 hende muhe a perde nan bida den 2025 pa motibo di homicidio, compara cu 44 den 2024. Di esaki, 17 tabata asesina pa un pareha of ex pareha, cual ta menos cu e 27 di e aña anterior segun Dutch Femicide Monitor.

Marieke Liem, profesor di seguridad

y intervencion na Leiden University a conta NOS cu e cifranan actualmente ta duna "optimismo cauteloso." El a agrega cu "solamente si e cifra aki keda mas abao pa dos aña nos por berdaderamente papia di un disminucion. Eora tambe nos por examina e motibonan tras di esaki."

A pesar di cantidadnan mas abao, expertonan ta adverti cu e riesgo ta keda halto despues cu un muhe separa di su pareha. Liem a bisa, "investigacion ta demostra cu separa di un pareha ta un di e causanan mas principal pa un persona comete asesinato. Pues,

aunke e ta zona cruel, mas atencion na femicidio por resulta den mas morto."

Na Filomena, un centro pa violencia domestico y abuso di mucha na Rotterdam, e cantidad di hende muhe buscando ayudo a bira dobel. Manager Tanya Hoogwerf ta atribui esaki na atencion aumenta den media: "Mas hende muhe ta reconoce alertanan."

Hoogwerf a splica patronnan cu ta bini prome cu violencia den pareha: "Na comienso di e relacion, e ta idealisa e victima, despues gradualmente

ta debilita, controla y manipula e victima." E centro ta enfatisa cu mayoria caso ta keda scondi. "Nos ta mira solamente e punta di e sero."

Data mas recien tambe ta demostra cu e victimanan ta, en averahe, mas grandi cu den decadanen anterior. Den añanan 90, muhenan mas hoben tabata den riesgo, pero awo muhenan di entre 20 pa 40 aña ta enfrenta casi mesun riesgo cu esnan di 40 pa 60 aña. Liem a bisa cu e "grupo aki hopi biaha ta den relacionnan di hopi tempo, pensando cu ta normal of ta keda pa e seguridad di nan yiunan."

A haya curpa di mucha desapareci den canal di Steenwijk

(NLTimes) - E curpa di Calvin, e mucha di 8 año cu a disparce diasabra atardi, a ser haya diadomingo na e canal Steenwijkerdiep segun polis a reporta.

Segun AD, autoridadnan a bisa cu no tin motibo pa sospecha cu tabatin forza involucre. Diasabra anochi, temperatura den region di Steenwijk a cay te bao di 0, cu alrededor di -3 grado y un averahe di -2.4, cual ta hopi mas abao cu e normanan tipico di januari.

E mucha a ser mira ultimo alrededor di 7or di atardi diasabra cerca di un restaurant Chines banda di Steenwijkerdiep. Boluntarionan rapidamente a uni e buskeda, cu alrededor di 400 pa 500 persona buscando den e area den grupo chikito, segun reportanhenan locaEsfuersonan di buskeda tabata enfoca principalmente riba e canal, unda un ekipo di buceo a examina



e awanan bao di ijs, y camaranan tabata desplega bao aw. Un helicopter di polis tambe a yuda cu e operacion, banda

di gruponan boluntario specialisa, incluyendo Coordination Platform for Missing Persons Urk y Veteran Search

Team. Polis a emiti un alerta di mucha perdi diasabra anochi, describiendo e mucha

hombre como di aproximadamente 1.2 meter di haltura cu cabey preto, bisti cu un jacket blauw y carson blauw cu blanco. “Mirando e condicionnan di tempo y su edad, nos ta sumamente preocupa,” autoridadnan a bisa.

E buskeda a continua te anochi laat pero inicialmente no a duna resultado. Diadomingo, polis a puntra residentenan local pa evalua imagennan di camara di seguridad y revisa tur sitio cu por tin den e area pa cualkier señal di e mucha.

Polis despues a confirma cu e mucha su curpa a ser haya den e canal. “Nos ta duna danki na tur hende cu a uni pa busca e mucha aki,” nan a publica riba rednan social. “Nos ta desea e famia hopi forza durante e momentonan dificil aki.”

E circunstancia exacto alrededor di su morto te ainda no ta cla.

Curandero cu ta bisa di por cura cancer, homosexualidad y autismo aresta na Tilburg

(NLTimes) - Curandero controversial Tom de Wal a keda aresta diabierna anochi na Tilburg despues di tin un sirbishi di sanacion prohibi na Praise Church. Un dia despues, el a aparece na Eindhoven, predicando publicamente den medio di manifestacionnan.

De Wal inicialmente tabata den schedule pa ehecuta un servicio di sanacion na Van der Valk Hotel na Eindhoven diabierna, sinembargo e hotel a cancela e evento, probablemente a causa di e manifestacionnan anticipa. Despues el a move e evento pa Praise Church na Tilburg. E municipio a prohibi e sirbishi pa motibo cu e sitio tin falta di e permiso rekeri pa e evento y ticketnan a bende caba.

“E tabata un evento y ningun permiso pa evento a keda otorga,” un representante municipal di Tilburg a informa Omroep Brabant. Abogado retira criminal Pieter van der Kruijs di Den Bosch tabata den acuerdo, notando cu e “tabata den violacion. E no tabatin permiso pa e evento aki. Y aunke e tene esaki mas adelante riba caya, e tabata un evento tog. Y e no ta relevante si esaki a tuma luga paden of



pafo di e misa.”

A pesar di e prohibicion, De Wal a cuminsa e sirbishi. Polis a cera e area y a drenta e misa, pidiendo e pa stop esaki. Segun autoridadnan, el a cumpli paden pero a sigui cu e sirbishi pafo cu esnan presente. De Wal a keda aresta alrededor di 6or di atardi mientras e tabata papiando cu Omroep Brabant. El a ser interoga na stacion di polis y laga den libertad alrededor di 9or di anochi, ricibiendo un citacion pa violacion di ordenansa municipal. Van

der Kruijs no ta anticipa mas accion legal, declarando cu “Ministerio Publico no lo trece e caso aki dilanti corte.”

Imagennan di De Wal su organizacion, Frontrunners Ministries ta muestra su persona paden di e misa ta urgi esnan preesente pa coopera cu polis si nan purba clausura e sirbishi. Pafo, el a sigui e sirbishi te cu su aresto. Manifestantenan, incluyendo gruponan defensor LGBTIQ+, tabata presente manifestante contra e ponencianan cu e por cura malesanan maera cancer,

Parkinson’s y MS, ademas di “cura” homosexualidad y saca “demonionan” conecta cu autismo y otro condicionnan.

De Wal a critica e intervencion di polis, bisando cu “loke a sucede ta strano y no ta constitucional. Polis aparentemente tin e autoridad di drenta sirbishi di un misa. Hende tabatin ticket ayera, pero nan tabata gratis. Pa e motibo aki e no tabata un evento.”

Diasabra mainta, De Wal a bolbe presenta den centro di

Eindhoven, na 18 Septemberplein, cu alrededor di 100 siguido. Usando un microfoon, el a predica y a lidera oracion mientras manifestantenan tabata zwaai bandera di arco iris. Organizacionnan incluyendo Queer040, Eindhoven Pride y Dolle Mina;s, conhuntamente cu miembronan di e consejo di e ciudad for di PvdA, tabata presente. E sirbishi a inclui “sanacion” publico administra pa su asociadonan.

Durante e manifestacion, De Wal a atende controversia tocante su declaracionnan haci pa loke ta trata homosexualidad, bisando reporteronan cu “nunca mi a haci terapia di conversion; esey ta fabrica pa media.” El a nenga duna comentario tocante su declaracionnan anterior, marcando homosexualidad como un malesa.

Autoridadnan na Eindhoven a permiti e evento sigui pa motibo cu el a tuma luga pafo y no tabata clasifica como un evento formal. De Wal aparentemente tabatin plan i anuncia e creacion di un comunidad di misa na Brabant den e atardi aki, un presentacion cu tabatin plan di haci originalmente na e evento na Van der Valk Hotel.

Trump ta e temblor politico cu ta sacudiendo Latino America

(Infobae) — E captura di Nicolas Maduro pa Merca a dividi e region. Pero henter e pais kier evita di ta e proximo.

Pa ora cu dia 3 di januari a yega, WhatsApp ya tabata yen di mensahenan agita for di cabesnan di estado den henter Latino America, debatiendo con mester responde riba loke por ta e evento politico mas grandi den e region den e ultimo decadas.

Tabata loke algun a desea y otro tabatin teme: Merca a drenta Venezuela y a captura su presidente.

E reaccionnan a revela e linea di division cu ya tabata fraturando Latino America.

E tres paisnan mas grandi di e region—Brasil, Mexico y Colombia, tur goberna pa lidernan cu tendencia iski-erdistista— a critica e captura di presidente Nicolas Maduro pa Merca cu diferente grado di indignacion y diplomacia. Un lista creciente di paisnan derechista, entre nan Argentina, El Salvador y Ecuador, a aplaudi presidente Trump.

Y un grupo di paisnan mas chikito, manera Guatemala y Peru, a keda keto pa Washington no nota nan.

E reaccionnan divergente ta muestra con e administracion Trump, cada biaha mas agresivo, ta cambia politica Latino Americano. Aunke nan respuesta publico por ta diferente, tur ta parece di comparti e mesun meta den un era nobo di intervencionismo Mericano: autopreservacion. “Tur pais ta purbando di evita un conflicto cu Trump”, Jorge G. Castañeda a bisa, ex minister di Relacion Exterior di Mexico.

Trump a laga cla cu e kier controla America, declarando explicitamente cu “dominio Mericano den Hemisferio Occidental no lo ser cuestiona atrobe”.

Un mirada riba 3 di e pais mas grandi di Latino America ta muestra e presion nobo cu Trump ta eherce riba e region, y tambe e limite cu e ta yegando.

Mexico

Poco lider ta asina exponi na e demanda di Trump manera presidente Claudia Sheinbaum di Mexico.



Pa satisfac’e, su gobierno a enfrenta e cartel di droga, intensifica vigilancia fronteriso y impone tarifa te 50% riba hopi producto Chines.

A cambio, Trump ta bisa cu e ta gusta, aunke e ta sigui menasa atake unilateral paden di su pais. Diahuebs, Trump a parece di pasa for di retorica pa plan un concreto. “Ban cuminsa ataca e cartel”, el a bisa Fox News. “E cartel ta controlando Mexico”.

E promesa aki, dlanan despues cu avionnan Mericano a bombardia Venezuela, a haci e ‘cadena’ riba Sheinbaum mas strak. E presidente, pa su parti, a reacciona cu cautela tocante Venezuela.

Sheinbaum a rechasa categoricamente accion militar Mericano den otro pais, specialmente su mesun pais, pero su comentarionan riba Venezuela a ser midi cu cuido. “Intervencion nunca a trece democracia, nunca a crea prosperidad y nunca a

genera estabilidad duradero”, el a declara dialuna.

Pa no antagonisa Trump y Merca, su socio comercial mas grandi, Sheinbaum tambe tabata cuidadoso pa no liga Mexico demasiado fuerte cu condenacion global di e atake riba Venezuela, segun un funcionario Mericano di halto rango cu a papia bao condicion di anonimidad.

Aunke el a acepta firma un rechazo comun di accion Mericano — hunto cu Brasil, Colombia, Chile, Uruguay y Spaña — e ministerio di Relacion Exterior di Mexico no a publica e declaracion. E texto di 280 palabra tampoco a menciona Merca pa nomber. Despues cu Sheinbaum a papia cu presidente Luiz Inacio Lula da Silva di Brasil diahuebs, e lider Brasileiro a publica cu ambos “ta denuncia e atake”. Sheinbaum no a publica nada.

E dialuna despues, lider interino di Venezuela, Delcy

Rodriguez, a papia cu Lula y presidente Gustavo Petro di Colombia. Pero Sheinbaum no a papia cune, segun e funcionario Mericano.

En bes di esey, su gobierno ta cada biaha mas preocupa tocante atakenan Mericano den su territorio y ta concentra riba evita esakinan door di enfrenta e cartel mas fuerte y profundisa cooperacion di seguridad cu Merca.

Colombia

Petro tabata mucho menos diplomatico den principio. Despues di e captura di Maduro, el a haci publicacionnan sin para online, a discuti cu Elon Musk, a comparti imagnan crudo di loke tabata parece un victima y a bisa: “Latino America mester emancipa su mes atrobe”.

Trump, ken ya tabata apunta riba Petro, a reforsa su menasanan. El a yama Petro “hende malo”, a acus’e di trafico di cocaina y a bisa cu “e no lo dura mucho”. Ora nan a puntr’e si e tabata considerando accion militar contra Colombia, el a responde: “Esey ta bon pa mi”.

Esaki a causa un crisis inmediato. Petro a pidi Colombianonan subi caya y a bisa cu e mes lo tuma arma atrobe. Gobierno a reforsa su seguridad personal.

Despues, diripiente, ta parece cu e dos lider a reconcilia.

Den un yamada di casi un ora dialuna, media parcialmente door di senador Rand Paul di Kentucky, Petro a papia pa gran parti di tempo y a compromete di lucha contra cartelnan di droga. “Mi a aprecia

su yamada y su tono”, Trump a skirbi online. Nan a acorda pa reuni pronto.

Esaki no tabata e prome gesto di conciliacion di Petro. Coordinacion estrecho di Colombia cu autoridad Mericano contra narcotrafico a sigui, incluyendo aumenta eradicacion di plantacion di coca, aunke antes el a opone e politica aki.

Petro tambe ta enfrentando e realidad politico. Mientras e ta limita na un solo termino, su sucesor, scogi door di dje, ta participando den e eleccion di mei. Colombianonan kier bon un relacion cu Trump pa evita mas tarifa of un atake.

Argentina

Argentina tabata asina pega den crisis financiero cu casi no tabatin peso internacional. Trump a yuda cambia esaki. Presidente Javier Milei a bira e aliado mas entusiastico di Trump den e region y, por extension, lider ultra-dechista den Latino Americano.

Su esfuersonan a yuda. Ora Milei tabata enfrenta un crisis economico y politico aña pasa, Trump a dun’e un salbada di \$20 biyon. Un di e obhetivonan tabata pa yuda Milei gana control di Congreso Argentino den eleccion di medio termino. Y esaki a traha (tambe el a enrikece e aliado di Trump).

E yudansa aki a bin cu condicion. Argentina a acepta cambionan cu Washington a pidi, incluyendo riba propiedad intelectual y apertura di mineral critico. Aceptacion di influencia Mericano di Milei tambe a frustra hopi Argentino.

Pero den plano internacional, Milei ta relativamente comodo. Mientras otro pais Latino Americano ta haya menasa cu uso di forsa, Milei ta ser elogia. Presidente Argentino “ta sigui cumpli completamente”, Secretario di Tesorera Scott Bessent a skirbi online diabierna.

Mas aliado tambe ta surgiendo. Motiva pa preocupacion riba inseguridad y influencia di Trump, Chile, Bolivia y Honduras a inclina mas pa e banda derecha den e ultimo lunanan. Y e aña aki, Brasil, Colombia y Peru tambe por sigui, dunando Trump lidernan cu mentalidad similar den henter e continente Americano.



Drs. Leo J. Maduro

Recordando un ciudadano ehemplar: Hubert C. Maduro



Siman cu a pasa nos a perde un ruman, un amigo di gran valor. Un persona conoci den comunidad pa su responsabilidadnan oficial, pero hopi menos pa loke el a representa como ehemplo di loke ta spera di un ciudadano cu semper a cumpli cu su deber, sin keha y sin gaba nunca di su capacidnan di conocimiento impresionante.

Como ruman di Hubert Maduro, na bida griffier di hopi aña di Corte na Aruba, representante di Aruba pa varios aña den Raad van State na Hulanda, y presidente di Consejo Electoral na Aruba, mi ta testigo di e hecho cu mencion di e serie di responsabilidadnan importante ey no ta conta kico realmente e tabata significa. Mas cu tur cos e tabata representante di e generacion di empleado publico cu tabatin e conocimiento, tenacidad y curashi pa defende nan mes den un ambiente cu den e 40 aña di nos gobierno propio a para bira mas y mas hostile y politiza, cu poco aprecio pa e tipo di empleado publico cu no ta permiti pa midi nan capacidad intelectual y profesional segun nan obediencia ciego na deseo ministerial. E tipo di empleado publico cu nos pais ta carece grandemente awendia, segun mi opinion.


Mi experiencia cu mi ruman Hubert como consehero y coach a cuminsa poco tempo despues cu el a bolbe den añanan sesenta di su estudio como ingeniero specializa den landmeetkunde (Utre-

cht). El a pone mi na trabao como su ayudante den midimento di tereno, su trabao na DOW, durante fin di siman. Como alumno di secundario mi tabata haya matematica pero no tabata comprende nada di pakico y con ta aplica matematica den practica. Mi a siña con ta 'waterpas' un tereno, con ta aplica medicion di triangulo den esaki y despues e secretonan di midi superficie di tereno cu forma iregular. Despues mi a siña con ta compone un trayecto di caminda, cu parti di varios hyperbool y parabool cu ta conecta perfectamente cu otro. Despues tur cos cu tabatin di haci cu awa y con pa dirigi esaki na unda e mester bay, cu minimo daño na superficie di caminda di asfalt.

Despues di e funcion aki el a pasa pa forma parti di Servicio di Inteligencia di Antiyas na Corsou, unda den poco aña el a keda promovi como director interino. Pero su hamber pa mas conocimiento a hib'e pa Hulanda atrobe, unda el a bay studia ley na Universidad di Tilburg, unda mi mes a haci mi estudio di sociologia. Nos conversacionnan por a dura facilmente mas di cuatro o cinco ora, talvez pa desesperacion di su o mi partner, repasando tur cos cu tabata sucediendo den mundo. Honestamente, parti grandi e tabata na palabra y ami tabata sigui 'college' priva y gratis.

Esey nunca a cambia, te siman pasa...

Pero pa sigui cu su carera, el a bolbe Aruba na inicio di añanan 80. Net den tempo



cu Aruba tabata den preparacion di e Status Aparte. Como hurista na Wetgeving el a participa den e comision chikito cu a prepara nos Constitucion. Poco despues el a keda nombra na Corte unda el a traha cu un dedicacion increíble. Semper faltando recurso pa e sistema digital, el a haci henter un estudio di IT riba su mes, a siña programa den tur tipo di idioma digital y a construi henter e sistema digital pa Corte na Aruba. Den famia tabata conoci cu despues di pasa bebe coffi y conversa, e tabata bay oficina despues di 11 or di anochi pa wak si e sistema digital a 'back up' tur cos bon. Mainta tempran e tabat'ey atrobe na trabao...


Su conocimiento di ley, te den detaye, no tabata duna muestra solamente di un memoria fotografico, sino di un comprension admirable di contenido y di con pa liga aspecto legal y hudicial cu loke ta pasa den nos comunidad y den mundo.

Su trabao como representante di Aruba den e comision di preparacion di restructuracion di Antiyas a trec'e den contacto cu gobierno Hulandes, cu por cierto a propone Hubert como representante di Aruba den Raad van State. Su nombramento nunca a haya apoyo di e partidonan grandi; hasta a yega na e bacheza di no saca un anuncio di su nom-

mente tin e poder pa retira e Ombudsman. Aparentemente, politico no gusta cu ta sucede algo bon fuera di nan alcance, pero esey ta asina na tur parti di mundo. E valor di e nombramento fuera di politica a keda demostra na e momentonan cu Hubert mester a cruza spada cu esnan den gobierno, cu mester a reconoce cu nan no por a intimid'e pasobra nan no a nombr'e y no por a kit'e di e puesto tampoco. No ta esaki ta yama 'checks and balances' den un sistema democratico apropiada?

Mientras cu su carera oficial a termina varios aña pasa, su contacto cu coleganan hurista y abogado a continua, pasobra pa varios di nan tambe e tabata loke el a significa pa mi: un opinion honesto y superbon informa, semper 'fact based', sin 'second agenda'. E tabata conoce un bandera so, aunke su modestidad a impedi semper di gaba di amor patrio. Loke el a conserva semper tabata e hamber pa conocimiento, no solamente pa asunto legal, sino pa cu-alkier tereno di ciencia. Y pa mi ta sincero, esun cu mas a probecha di e 'collegenan priva' durante mas di cincuenta aña, ta ami mes. Mi a perde mas cu un ruman, mi a perde un 'brother' y un coach di bida largo. Te na final el a mantene e mente científico, conociendo su situacion di pacient cardiaco te den detaye, cu resignacion y curashi.

Hubert, Bibi, sosega na paz.



72 *Alegria y Fantasia*

Ganadornan di Calypso & Roadmarch infantil y hubenil ta conoci!

Un di e temporadanan mas colorido y yen di ambiente di nos isla a cuminsa, es ta nos Carnaval 72. Aki ta unda nos bunita cultura ta sali briya, y e gran cantidad di talento cu tin den tur generacion ta tuma centro di atencion.

Durante e fin di siman aki, a tuma luga varios evento en conexion cu Carnaval 72. Entre esaki, a tuma luga Calypso 7 Roadmarch Infantil y Hubenil.

Aki e lista di ganadornan di e anochi exitoso y grandioso.

Pa loke ta trata e ganadornan infantil:

Best Costume - Haily Philips
Mas Ambiente - Adeliza Henriquez
Mas Popular - Ashandric Richardson
Rookie of the Year - Zaidyen Danker

Calypso King a bay pa Ashandric Richardson - Jammer Jr. cu "Help Me", di cual Michael Odor ta areglista y Charles Hooker ta compositor.

Roadmarch King/Queen a bay na Adeliza Henriquez - Queen Fantasy cu "Dutch Troopers", di cual Harvey "Tools" Agunbero ta areglista y compositor.

Di dos luga pa Calypso a bay pa Carl Jr. Roosberg - Galloway Jr cu In My Dreams, di cual Samuel Jack ta areglista y Carl Roosberg Sr. ta compositor, di dos luga pa Roadmarch ta Zaidyen Danker - Johnny Boy cu Johnny Boy The Instructor cu areglista Rygel Isabella y compositor Janiro Eisdén y Rygel Isabella.

Di tres luga pa roadmarch a bay pa Ashandric

Richardson - Jammer Jr. cu "Carnaval is a Party" cu areglista Rygel Isabella y compositor Aric Richardson.

Pa loke ta trata e ganadornan infantil:

Best Costume - Reanne Ras
Mas Ambiente - Justin Trenidad
Mas Popular - Justin Trenidad

Calypso Queen a bay pa Caylee Pietersz - Dancing Cay cu "We Calling for Change", di cual Dolfi Richardson como tanto areglista como compositor.

Roadmarch King a bay pa Brayden Elisabeth - Stinging B Junior cu "Tribe Chief" y Rygel Isabella como areglista y compositor conhuntamente cu Janiro Eisdén.

Di dos luga pa Calypso tabata di Ivy-Anne Browne - Queen Ivy cu "Always number One", di cual Ralph Godet tabata areglista y Marina Hayes compositor. Di tres luga tabata Caylee Fraser - Queen C cu "You Belong", di cual Kenneth Bosnie tabata areglista y compositor conhuntamente cu Carol Bruining

Di dos luga pa Roadmarch tabata Reane Ras - Reanne cu "What Time is it" cu Rygel Isabella como areglista y compositor conhuntamente cu Janiro Eisdén y di tres luga pa Stephanie Quant - Stephanie cu "carnaval Possess Meh" cu Rodney van der Biezen como areglista y Maiky "Campo" Oliva como compositor.

Un pabien grandi ta bay na tur gañado y participante di e edicion aki di Calypso & Roadmarch infantil y hubenil.



NBA ta suspende Schroder pa motibo di un incidente fuera di cancha

(AFP) - NBA ta duna Sacramento Kings su Dennis Schroder un suspension di 3 wega pa motibo di "confrontacion y purba golpia otro hungado," e liga a bisa diasabra.

NBA a bisa den un publicacion cu e incidente a sucede alrededor di 40 minuut despues di Kings su perdida

125-101 contra Los Angeles Lakers dia 28 di december na Crypto.com Arena/

Aki, e liga a bisa, "Schroder a busca e hungado den e sitio y a inicia e confrontacion."

E liga no a identifica e hungado den oposicion, pero varios outlet di media Mericano a reprota cu ta Luka Doncic,

ken a intercambia palabranan fuerte cu Schroder durante e wega.

Alemania su Schroder lo cuminsa cumpli su suspension diadomingo ora cu Kings ta hunga contra Houston Rockets. Tampoco e no lo por participa den e siguiente wega contra Lakers y un wega contra New York Knicks.



Super-G di hende muhe cancela pa motibo di mal tempo



(AFP) - Copa Mundial di hende muhe super-G na Zauchensee a keda cancela pa motibo di condicionnan di mal tempo, International Ski Federation (FIS) a anuncia diadomingo.

"Pa motibo di sneeuw pisa y bientonan fuerte na e veld, e organisadornan y hurado di careda a dicidi di cancela super-G. E condicionnan actual no ta permiti nos garantisa e nivel rekeri di

seguridad," FIS a skirbi riba Telegram.

Diasara, e programa na e resort Austriano por a sigui pero e comienso a keda baha pa motibo di e mal tempo.

Mericano di 41 aña Lindsey Vonn a logra victoria cu su di 84 Copa Mundial.

E cancelacion ta nifica cu awo tin dos careda super-G mas prome cu e evento di Olimpiada di Winter na

Cortina d'Ampazzo dia 12 di februari.

Esaki ta e di dos cancelacion di Copa Mundial den e temporada aki, despues di e prome 'downhill' di hende homber na Beaver Creek den comienso di december, cual a cambia pa Val Gardena na Italia dos siman despues.

Alpine Ski World Cup ta sigui diaamrs atardi cu slalom na Flachau, Austria.

Osimhen a enfoca riba exito y no kibra record

(AFP) - Victor Osimhen tabata enfoca riba gana Africa Cup of Nations, no bira Nigeria su top despues di a logra victoria den Super Eagles' su wega 2-0 contra Algeria.

El a duna Nigeria a posicion dilanti Marrakesh den su di 35 gol den 51 wega pa su pais, prome cu el a yuda colega den ekipo Akor Adams pa e di dos, logrando cu Super Eagles lo bay semi-final contra Maroco.

Osimhen, di 27 aña, awo ta 2 gol leu di iguala e record di ekipo nacional di 37 gol cu Rashidi Yekini tin actualmente y ken ta miembro di e banda di Nigeria cu a gana AFCON den 1994 y tambe a hunga na dos Copa Mundial.

"Absolutamente cu no," Osimhen a bisa ora a puntra si kibra e record lo ta den su mente na su weganan restante di Cup of Nations. "Mi a bisa varios biaha caba cu no ta importa si mi iguala of supera e record," ex integrante di Napoli cu a anota 9 biaha den su ultimo 8 wega internacional, incluyendo na fin di e clasificatoria pa Copa Mundial, a

comenta. "Rashidi Yekini ta e miho striker cu Super Eagles a yega di produci y pa'mi, mi ta djis purba di haci mi best pa e team. E ta grandioso pa por forma parti di e historia pa Super Eagles pues mi djis kier gana algo pa mi pais."

Osimhen, ken tin 4 gol den e ultimo weganan di AFCON, a agrega: "Mi tin asina hopi confiansa den e manera cu mi ta hunga cu e ayudo di mi ekipo, pero pa'mi e no ta trata e golnan of asistencia, e ta tocante gana algo cu e ekipo aki. Nos ta den bon caminda pero e no lo ta facil."

Nigeria lo hunga contra Maroco den e ultimo 4 proximo diaranson na Rabat, e ciudad unda nan speransa pa un Copa Mundial a caba den un perdida durante penalty contra Republica Democratico di Congo.

Nan respuesta na un di dos campaña di clasificatoria pa Copa Mundial fracasa ta impresionante, cu Nigeria ganando tur 5 wega te awo di Cup of Nations y anotando 14 gol edn proceso.

Nan por a gana cu un margen hopi mas grandi contra Algeria cu varios chens den e

prome mita prome cu Osimhen a logra net despues di bolbe sigui cu e wega.

"Mi tabatin un manera di hunga den mente ora cu mi a tuma e trabao y mi ta kere cu nos tin un identidad den e ekipo awo, ambos cu y sin e bala," Egipto su coach Eric Chelle a comenta.

"Nos por a ta 2-0 pa ora nos a yega half-time. Nos tabata un poco mas clinico den e di dos mita, e bala final tabata un

poco miho. "Mi ta contento y e hungadonan ta disfrutando tur cos. Nos djis mester pur-

ba mantene e dinamica positivo aki andando," e coach a sigui comenta.



Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organisacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Gregorio Wolff

Trump/Merca a secuestra Maduro. Kico Awor?

Den oranan di marduga dia 3 januari 2025, Ehercito Mericano a lanta Presidente Nicolas Maduro y su casa Cilia Flores for di soño, hibanan den un helicóptero pa después subi avión y hibanan New York. Un acción relámpago cual a ricibi hopi atención como algo “sublime” di e ehército Mericano.

Pero mesora tur hende cu ta analisa e sucedido mester yega na e conclusión cu aki ta trata di traición y cumpramento di militarnan. Durante e oranan después di e acción relámpago a sali na cla cu como 8 guarda-espaldanan tambe a hui den e helicopternan mericano y un grupo grandi (+30) di Guarda-espaldo Cubano a ser asesina.

Pues enberdad sublime mester ta entre comiyas. Pakico?

Pasobra ta Trump a duna CIA un proyecto di un año pa “menasa y cumpra” e guarda-espaldanan di Maduro, Generalnan, oficialnan y mas militar pa facilita e kidnapping di Maduro y su señora. Informacion a Sali cu e servicio di Inteligencia di Israel Mossad tambe tabat envolví. Casonan di cumpramento igualmente a ser haci na Iran na Juni ultimo y na Syria na december 2024. Nada di accion sublime y sofistica di ehército Mericano.

Un táctica conocí, menasa y cumpra cual Trump semper a uza ora e tabata den problema pa scapa for di justicia, ora e a comete su fechorianan. Mira e declaracion anexo cual ta bay hunto cu e comunicado aki. Maduro a comporta su mes mes manera un líder grandi, sin miedo y cara den halto. Su prome palabranan ora e a baha e avion na New York na tur e funcionarionan kendenan a bin buske tabata, “Happy New Year”. Cual sigur a keda graba cerca hopi hende.

Gobierno Venezolano tabatin un Plan B pa sorto di situacionnan asina

Prome nan mester a sana e ehército di e elementonan traidor, kendenan a coopera cu CIA y ehército Mericano. Esnan cu a hui y bay, por lo

pronto a scapa, pero hopi a keda atrás y gobierno mester a tuma medida contra nan, pa e actonan di traición no tuma lugar mas.

Berdad e situación financiero di hopi hende na Venezuela, tambe pa e militarnan ta durador di e accionnan di sancionnan y boycott ya pa mas di 12 año, pero pa bo traiciona bo país na favor di otro país ta hopi repudiabel y un castigo severo ta spera nan.

Den ora di atardi di 3 januari 2026, después di reorganizacion den ehército y saca hopi traidornan, e gobierno nobo di Venezuela a keda instala di acuerdo cu e constitución di Venezuela. E constelación a keda igual, solamente e vicepresidente Delcy Rodríguez keda encarga temporalmente cu e trabaoan di Presidente di Venezuela, esta e presidente encarga.

Nicolas Maduro ta keda Presidente di Venezuela. E mesun plan di ehecucion di gobierno Venezolano a keda den función, awor cu Delcy Rodríguez na Cabece.

Su prome declaración ta cu gobierno di Venezuela ta exigi di inmediato e liberación di Presidente Maduro y cu nan ta sigui nan política acorda na defensa di e pueblo di Venezuela.

Tambe Delcy Rodríguez a pidi pueblo Venezolano pa sigui cu nan apoyo na gobierno y ehército. Y berdad, diadomingo 4 januari, miyonnan di Venezolano na tur ciudadnan y pueblonan di Venezuela a subi caya, dunando gobierno tur nan apoyo y exigiendo e libertad di nan presidente Nicolas Maduro.

Declaracionnan yena cu locura di Gobierno Trump

Analizando e situación nos tin di destingui dos asunto.

E acción militar cu no tabata algo espectacular, ya cu e táctica Semper uza dor di Trump pa menasa y después cumpra hende, a wordo poni den practica akinan.

Consecuencia di esaki ta cual ta e grado di fortaleza cu e ehército Venezolano a keda cune? Hopi di e traidornan a

hui, hopi a wordo identifica y a tuma medidanan, pero sigur tin hopi cu a traiciona, ainda a keda den e ehército Venezolano. Sigur Trump ta bini cu mas acción militar di Merca, ya cu e gobierno di Venezuela no ta bay cumpli cu e exigencianan di Trump y Venezuela mester di un ehército fuerte.

E declaracionnan di Trump cu su ministronan tambe a tene un conferencia di Prensa mainta 3 januari 2026. E declaración mas importante ta: Gobierno di Trump/Merca ta bay “RUN” Venezuela despues di loke nan ta yama e secuestro di Presidente Nicolas Maduro y su esposa, un Regime-Change Operation. Run, Kier meen gobierna e país, esta traha y pone leynan nobo den función, maneha e economía, duna servicio publico y hinca e pueblo den nan sistema político. E ta tur cos cu un gobernación mester haci. Pero según Trump e ta un gobernación unda Merca ta haci di Venezuela un protectorado, esta un sorto di colonia di Merca, cu 3 lidernan di gobierno Mericano cu nan posicionnan di directornan colonial ta bay dicidi con e gobernación di e colonia ta bay bira.

Pa tur hende cu dos placa di sinti, esaki ta muestra un locura, un plan di fracaso, cu solamente Trump y Marco Rubio por construi. Secuestro di e presidente di Venezuela no ta Regime Change. E acción militar ta absolutamente ilegal y contra tur derechonan internacional, contra e charter di ONU (organizacion di Nacionnan Uni), cual ta prohibi gueranan di agresion. Ningun hende di bon voluntad, cu un tiki inteligencia, cu ta respeta derechonan internacional, soberanía di cada pueblo, respet pa derechonan humano, respet pa democracia, cu no por invadi militarmente un pais soberano y haci loke ta bo gana y hopi mas, por para tras di e política agresivo di Trump y su hendenan.

Venezuela a reorganisa su gobierno y aparentemente den pura su ehército. Venezuela a adapta su gobier-

no cu un consejo di Ministro nobo. Nan ta run e país. Nan ta e gobierno legitimo.

Trump cu su Blizkrieg di 3 januari, yama Regime Change, awor mas liher kier pa haci Venezuela un colonia di Merca, esta bay bek 200 año den historia. Esaki ta sosode cu aprobación di un ley den Congreso y Senado Mericano. Gobierno Venezolano cu Delcy Rodríguez na cabes mester keda trankilo. Duna tempo, tempo y warda kico ta reaccionnan di político na Mundo arriba tur e locuranan di Trump y su hendenan.

Mas locura di Trump y Marco Rubio

Trump a sigui papia mas locura, cu for di Merca nan lo RUN Venezuela.

Nan no ta bay ocupa Venezuela militarmente, ta orden nan ta duna for di Merca, via Remote Control y Delcy Rodríguez mester cumpli. Si Delcy Rodríguez no cumpli cu deseo di Merca algo lo pasa cu ne y pio cu loke a pasa cu Maduro. Delcy Rodríguez a bisa cu hamas Venezuela lo bira un colonia o protectorado di Merca o di otro país. Su persona no ta bay sigui ningún orden di Trump y ta ripiti cu Gobierno Mericano mester libera e presidente di Venezuela Nicolas Maduro.

Kico e menasa di Trump ta, e no a bisa.

Kico ta e motibo cu nan no ta ataca Venezuela y ocupa e país. Miedo cu un guerra asina lo bay dura demasiado tempo? O nan no tin bastante militar pa cumpli cu e acción aki. Na 2019 tambe tabatin e declaracionnan di dirigentenan di gobierno Trymp “All options are on the table”, incluyendo e opción militar. Toch nan no a cumpli.

E ministro di defensa di Merca na 2019, a bisa después den e añanan 2021 o 2022, cu no tabatin suficiente militar pa invadi y ocupa Venezuela.

Algo cu ta sigur awor ta, cu e posición original di Trump cu e problema di Venezuela ta trafico di droga, ya no t’ey mas. Tur loke Trump y su gobierno awor ta tras di dje ta petroli y tur loke tin den suelo di Venezuela y di tur país La-

tino-Americano. E pregunta grandi ta awor, cuanto Venezolano ta apoya e postura di Trump pa haci Venezuela un Colonia di Merca. Un hende drechi sigur cu no. Pero bo ta bay haya hende cu e bandera di Venezuela, apoyando Merca. Traicion ta keda na Mundo, pero pa traidornan. Trump a sigui bisa cu nan lo trece nan companianan petrolero mas grandi, e mas grandinan di mundo, nan lo inverti biyonnan di dollar, fix e infraestructura di Petroli y cuminsa traha placa na bienestar di Merca. Si e gobierno di Venezuela no cumpli cu e demandanan di Trump, Merca lo bombardea di nobo y si mester hacie di nobo e lo ta mas pio.

E pregunta grandi cu pueblonan ansiosamente kier tende

No a tende un pronunciamiento di Congreso y Senado Mericano. Tur dos cu ta bisa cu nan ta respeta derechonan internacional, derechonan humano, derecho di autodeterminacion di pueblonan y otronan. Varios congresista y senadornan ya a duna nan opinión personal, sea pro o contra Trump, pero e instancianan aki, Congreso y Senado Americano no a vocifera nan opinión ainda.

Kico ta opinion di ONU (Organización di Nacionnan Uni). Cu ansioso tur hende ta warda e discusion den Asamblea General y den Consejo di Seguridad di ONU. E discusionnan lo ta interesante, ya cu cualquier proposición den Consejo di Seguridad respalda pa Venezuela, maske Venezuela no ta miembro, sigur lo ricibi un Veto di Merca.

Tambe e posicion di e dos podernan na Mundo, Rusia y China, cual paisnan Semper ultimo añanan a apoya e gobierno Chavista, cual paisnan tin inversionnan grandi na Venezuela y Tin acuerdo militar cu Venezuela manera Rusia.

Nan lo keda solamente cu nan solidaridad pa cu Venezuela o nan lo duna Venezuela e apoyo militar suficiente pa e pais para duro.

Companianan ta gana eficiencia cu AI, pero tambe ta enfrenta riesgo halto di ciberatake

(Infobae) — Adopcion acelera di inteligencia artificial den un mundo corporativo ta genera un efecto dobel: mientras companianan ta logra automatiza nan proceso, mehora productividad y tuma decisionnan mas lihe, nan tambe ta ser exponi na un nivel sin precedencia di riesgo digital.

Reportahenan recien for di e sector tecnologico ta adverti cu 97% di companianan ya a sufri incidentenan di seguridad conecta cu uso di inteligencia artificial, un cifra cu a confirma cu e problema a stop di ta teoretico y a bira un menasa concreto pa 2026. E datonan ta resulta for di analisis realiza pa actornan clave den e ecosistema tecnologico, entre nan Akamai, Globant, PwC y Fortinet, cu ta coincide cu inteligencia artificial ya no ta solamente un instrumento di eficiencia of defensa, sino tambe un vector nobo di atake cu ciber-criminalnan ta explotando na un manera cada bes mas sofisticada.

Promesa di inteligencia artificial empresarial ta cla. Modelonan di idioma, agente autonomo y sistemanan in-

teligente ta permiti optimisa operacionnan, baha costo y escala negoshi mas rapido. Sinembargo, cada sistema nobo conecta cu datonan sensitivo ta amplia superficie di atake y ta desafia schemanan tradicional di ciberseguridad.

Un dilema strategico pa companianan

Organisacionnan ta enfrenta un dilema dificil pa evita. Sigui cu adopcion di inteligencia artificial ta casi un obligacion competitivo, pero haci esaki sin un strategia solido di seguridad ta implica asumi riesgo halto.

Segun Akamai, ta abusando di modelonan grandi di idioma usando tecnica specifico, manera inyeccion di instruccionnan malicioso, contaminacion di datonan di entrenamiento of manipulacion di fuentenan externo conecta cu sistemanan di inteligencia artificial.

Al contrario na ciberatakenan clasico, e practicanan aki no ta rekeri viola software convencional, loke ta haci nan dificil di detecta cu instrumento comun. Segun Jairo Para, especialista den ciberseguridad na Akamai America Latina, enfoke di riesgo a


move pa henter e ciclo di bida di inteligencia artificial: for di entrenamiento di modelo te ora di nan implementacion y actualisacion.

Si datonan di entrenamiento ser altera of si un modelo ser induci pa comporta su mes di forma inespera, e impacto por ta silencioso pero profundo, afectando procesonan automatiza, decisionnan empresarial y, finalmente, usuarionan.

Di fraude individual pa atake corporativo

Un otro tendencia cu ta preocupa expertonan ta uso di inteligencia artificial como instrumento directo di crimen. Segun proyeccionnan di Akamai, cibercriminalnan ta cuminsa usa modelonan di idioma y automatizacion avansa pa lansa estafa dirigi especificamente na companianan, bandonando fraude masivo contra usuarionan individual.

Un di e vectornan mas sensitivo ta manipulacion di identidad. 'Deepfake' den tempo real ya a yega na nivel di realismo cu por engaña incluso profesionalnan cu experiencia, moviendo estafanan pa reunion virtual, entrevistando



an di trabao of yamadanan corporativo. Den e escenario aki, e idea cu "mira ta kere" ta perde su validez y ta rekeri innovacion di mecanismonan pa verificacion di identidad.

E fenomeno aki no ta afecta solamente companianan. Consumidornan tambe ta ser exponi na un forma nobo di fraude, robo di identidad y perdida di confiansa den sistemanan digital, specialmente den servicio di pago y plataformanan automatiza.

Un problema casi universal

Diagnostico di Globant ta refora e vision aki. Den su rapport "Tech Trends 2026", e compania ta señala cu organisacionnan ya a pasa den e fase experimental di inteligencia

artificial y ta moviendo pa inteligencia operacional y escalabel. Sinembargo, e paso aki ta implica gran exposicion. Segun e rapport, 97% di companianan a sufri incidentenan di seguridad relaciona cu inteligencia artificial, den hopi caso debi na control di acceso insuficiente.

Globant ta adverti cu atacadornan ta usa inteligencia artificial pa automatiza tarea di reconocimiento, explota vulnerabilidadnan y genera engaños cada bes mas creibel. Na frente di esaki, companianan ta cuminsa adopta modelonan di defensa predictivo basa riba inteligencia artificial, aunke tecnologia so no ta suficiente si no tin un strategia cla di gobernacion.

E mashin cu a reemplaza hende den cosecha di appel na Europa

(Infobae) — Plantacionnan grandi di appel na Europa ta pasando den un transformacion profundo: introduccion di cosechadornan automatico manera FELIX/Z ta reemplazando trahadornan den recoleccion di fruta. E cambio ta responde na un falta di labor, costo creciente y presion pa garantiza eficiencia den fincanan di fruta.

Avance di tecnologia agricola a modifica e imagen tradicional di gruponan humano canando entre rijnan di mata di appel. Den paisnan manera Polonia, Francia y Alemania, mecanisacion ta gana tereno den medio di campananan cada biaha mas exigente debi na condicionnan climatico y competencia internacional.

Compania WEREMCZUK, cual ta basa na Polonia, a revolucionar e actividad desaroyando FELIX/Z, un mashin unda su funcionamiento ta sorprende incluso esnan cu



conoce agricultura moderno. Conecta na un tractor, FELIX/Z ta move riba rijnan di mata di appel y ta activa cabesnan vertical cu ta sacudi e ramanan den par seconde. E appelman ta los y ta cay riba e banda flexible, pasando door di un sistema di limpieza y clasificacion, y terminando den caha prepara pa transporte. E sistema ta evita fruta touch

suela, minimizando daño y reduciendo perdida causa pa putrimiento.

Diseño di FELIX/Z ta responde na e tendencia creciente di sembra riba muraya, un sistema cu ta facilita tanto manejo di cultivo como mecanisacion. E version standard ta incorpora dos vibrador vertical, mientras e modelo 4SH ta agrega cuater cabes, loke ta

aumenta intensidad y rapidez di recoleccion. E mashin por cubri te 0,8 hectar pa ora.

E impacto economico di mecanisacion tabata decisivo pa su adopcion den paisnan productor principal. Na varios di nan, costo laboral ta supera 50% di e gasto total di cosecha. Bahando e porcentahe aki y acelera e ciclo di recoleccion a bira un obhetivo

central pa rentabilidad di e actividad.

Sinembargo, recoleccion manual ta sigui ta valido den segmento di appel di mesa di alta calidad, caminda apariencia y cuidu di fruta ta esencial pa satisface mercadonan exigente. Den e caso aki, trabao humano ta ser complementa cu plataforma autopropulsa y ayudadonan mecanico, cual ta permiti trahadornan cumpli cu tareanan mas cualifica y menos repetitivo.

Cu un produccion anual cu ta supera 11 miyon tonelada, appel ta keda un di e pilarnan di fruticultura Europeo. Futuro di e sector ta dirigiendo pa un coexistencia entre tecnologia y trabao humano, caminda cosecha mecanisa ta consolida como un instrumento clave pa fortalece competitividad y sostenibilidad di fincanan grandi, sin reemplaza completamente cuadrnan tradicional.

Cantante Colombiano, Yeison Jimenez a fayece cu 34 aña



(TMZ) - Strea di musica Colombiano, Yeison Jimenez a fayece despues cu su avion a cay na Colombia.

E avion a cay diasabra tardi den e area entre Paipa y Duitama, matando tur seis persona abordo, segun oficialnan Colombiano.

E vuelo tabata bayendo Medellin y a crash tiki despues di despegar.

Team di Jimenez a confirma

su morto den un declaracion riba Instagram, yamando e perdida "indescrible" y honrando e no solo como artista, sino como yiu, ruman, y amigo cu a inspira miles.

Ta kere cu e avion tabata pertenece ta compania di Jimenez. E tabata biahando pa un presentacion na Medellin. Den un post final, fotografo Weisman Mora a comparti video paden di e avion apenas momentonan prome cu e crash, mustrand e avion riba e pista.

Video saca despues di e accidente ta muestra e avion na candela, mientras personal di emergencia tabata purba paga e candela.

Jimenez tabata un di e artistanan mas exitoso di Colombia, conoci pa mescla ranchera Mexicano cu influencianan Colombiano.

E accidente ta keda bao investigacion. Jimenez ta laga atras su esposa y tres yiu. E tabatin 34 aña di edad.

Co-fundador di Grateful Dead y guitarista Bob Weir ta fayece cu 78 aña di edad

(AFP) - Guitarista Mericano y escritor Bob Weir, un miembro fundador di e banda revolucionario Grateful Dead, a fayece cu 78 aña di edad, su famia a anuncia diasabra.

Weir a keda diagnostica cu cancer den juli y a logra combati e malesa, pero "no a logra contra problemanan di pulmon," su famia a bisa den un declaracion riba su website personal, sin specifica unda ni ki tempo el a fayece.

"Pa mas di 60 aña, Bobby a subi caya," e declaracion a bisa. "Pa semper Bobby lo ta un forsa cu ta guia esnan cu su arte unico a cambia forma di musica Mericano."

"Su trabao a haci mas cu yena sitionan cu musica, e tabata un luz di solo caluroso cu a yega alma, crea un comunidad, un lenguahe, y un sentimento di famia cu genera-

cionnan di fanatico ta carga cu nan."

Funda na San Francisco pa Weir, Jerry Garcia, Ron "Pigpen" McKernan, Phil Lesh y Bill Kreutzmann, Grateful Dead a bira un di e gruponan musical lider cu a surgi for di 1960 su movimiento.


Cu su estilo cu ta combina genero, e banda a bira conoci pa nunca duna e mesun show dos biaha, ganando un legion diverso di fanatico y bendiendo miyones di grabacion. E grupo a revolucionar tambe e interaccion cu fanaticonan, como siguidonan - famosamente conoci como "Deadheads" - a grapa y intercambia grabacion an conciertonan den un ambiente comunal, yen di droga cu tabata bay di stadion pa stadion, un moda cu despues otro bandanan su fanatico a copia.

E grupo a separa den 1995,

algun luna despues cu guitarista lider Garcia a fayece cu 53 aña y un aña despues cu a introduci e grupo na Rock & Roll Hall of Fame.

Weir sinembargo a sigui duna concierto di manera intermitente cu otro miembronan di e banda na bida, mas recientemente den e grupo Dead & Company, cual tambe a inclui guitarista y cantante John Mayer. "Mientras nos ta recorda Bobby, e ta dificil pa no sinti echo di e manera cu el a biba," e famia a bisa. "Un homber bibando y soñando, nunca preocupa si e caminda lo hib'e cas. Un yiu di un gran cantidad di mata. Un yiu di lamanan sin fin," e famia a bisa, citando e canticanan "Cassidy" y "Lost Sailor," skirbi pa Weir y difunto John Perry Barlow.

Despues di Weir su fayecimento, drummer di 79 aña Kreutzmann a bira e ultimo



miembro bibo co-fundador di Grateful Dead/ Bahista Lesh a fayece na october di 2024 cu 84 aña, mientras cu McKernan, ken tabata toca keyboard, a fayece cu 27 aña den 1973.

Den 2024, durante e ultimo aña di Joe Biden su presidencia, Weir y otro miembronan bibo di Grateful Dead a ricibi Kennedy Center Honors, entre e premionan mas halto pa

arte Mericano. "The Grateful Dead semper tabata tocante comunidad, creatividad y exploracion den musia y presentacion," Weir, Hart, Lesh y Kreutzmann a bisa e tempo aki. "Nos musica ta pertenece mesun hopi na nos fanaticonan, Dead Heads, mescos cu e ta pertenece na nos. E honor aki, e ora, ta mesun hopi di nan cu e ta di nos."

Museo Nxt na Amsterdam-Noord ta habri su portanan atrobe despues di haya subsidio grandi

(NLTimes)—Museo Nxt na Amsterdam-Noord, cual a declara bancarota luna pasa debi na debenan acumula for di e pandemia di COVID-19, a anuncia cu lo habri back diasabra despues di un rescate financiero exitoso.

Directora Merel van Helsdingen a bisa cu e sobrevivencia di e museo a ser garantisa danki na un subsidio substancial for di Cultuurloket DigitALL, un fondo sosteni pa instancianan gubernamental y partnernan comercial.

"Mi a ricibi un email maraviyoso for di Tanja Zuijderwijk, ken ta dirigi Cultuurloket DigitALL. El a bisa cu el a keda den shock pa e noticia di bancarota y cu e kier yuda. El a laga mi den lagrima," Van Helsdingen a bisa Het Parool.

Cathelijne Broers, directora di Cultuurfonds, a enfatisa e rol distinto cu Museo Nxt ta ocupa den e sector cultural Hulandes. "Nos ta kere den fortalece e sector cultural pa conecta tecnologia cu e publico. Museo Nxt ta ocupa un posicion unico den e panorama aki," Broers a bisa. Van

Helsdingen a nenga di revela e suma exacto di e subsidio, citando confidencialidad.

E restructuracion financiero di e museo ta inclui un cambio den su estructura organizacional. E museo a establece un compania priva nobo, unda e Nxt Foundation afilia ta tuma un rol principal.

E fundacion lo maneha e actividadnan di e museo, incluyendo exhibicion, colaboracionnan y benta di ticket, reemplasando e compania priva cu anteriormente tabata maneha solamente al-



gun proyecto y eventonan selectivo. E exhibicion Still Processing, cu ta explora tecnologia y percepcion humano, lo ser presenta durante e reapertura.

Potret di NXT Museum.

Accidente cu hende herida na crusada di Dakota!

Diabierna atardi a drenta informe di un accidente cu hende herida na e crusada banda di Entertainment Center na Dakota, mesora a dirigi tanto polis como ambulance.

Na yegada di e patruya a bin compronde cu aki ta trata di un accidente entre 3 auto unda e chauffeur di un Toyota Corolla biniendo for di Druivenstraat no a duna preferencia na e Chevrolet Groove cu tabata bini di nort na Avenida Milio Croes y esaki a dal e Corolla y e im-



pacto a manda e Corolla bay dal un otro Chevrolet para ta warda na Stadionweg. Debi na e impacto 2 persona a re-

sulta herida. Na yegada di e ambulance nan a atende e victimanan y a transporta nan pa hospital.



Auto a bay bira na man robes net ora motociclista ta bay pas'e y nan a dal den otro



Diabierna mainta a drenta informe di un accidente cu hende herida dilanti na Sero Blanco, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di un accidente unda un Suzuki Swift biniendo di nort a bay bira na man robes net ora cu un motociclista ta bay pas'e y nan a dal den otro. E motociclista a dal abao, lastra riba vloer y keda herida. Na yegada di e ambulance nan a atende e motociclista y a transport'e pa hospital.

Chauffeur coriendo cu velocidad halto a bay dal riba e muraya di Tierra del Sol

Diabierna madruga a drenta informe di un accidente cu hende herida na e birada di Tierra del Sol na Westpunt, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di e hoben chauffeur di un Kia Cerato coriendo cu velocidad halto y pa un of otro motibo a perde control, baha caminda y bay dal riba e muraya di Tierra del Sol.



El a resulta herida mientras e auto mes a keda cu hopi daño material.

Na yegada di ambulance nan a atende e victima pa e heridan cu el a ricibi.



Destruccion cometi na auto staciona banda di Sasakiweg

Diasabra madruga a drenta informe di un caso di destruccion cometi na un auto staciona na Sasakiweg, mesora a dirigi un patruya na e sitio.

Na yegada di e patruya a bin compronde cu aki ta trata di destruccion na e glas di e bentana banda di chauffeur. Aki a causa e destruccion na e auto di un compania unda cu posiblemente ladron-




nan a purba kibra e bentana pa comete ladronicia pero aparentemente e ladron no a logra basha e bentana abao pa drenta horta. Polis a tuma

e keho y a keda di bay wak e camaranan den vecindario pa asina logra captura e malhechor.



Accidente frontal cu hende herida na Santa Cruz



Accidente frontal cu hende herida na e T-kruising pabao di Centro di Husticia na Santa Cruz, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di un accidente frontal entre un Hyundai Getz y un Hyun-

dai Santa Fe unda e Getz
biniendo di nort a bira pa bay
pa bira pero a lora net ora cu
e Santa Fe tabata biniendo di
direccion contrario y a dal e
bir'e cara panort. Den e Getz
tabatin un chauffeur di edad
cu a haya un kap na su cabes.
Na yegada di e ambulance
nan a atend'e y a transport'e
pa hospital.

Chauffeur a bay dal riba palo di luz na Santa Helenastraat

Diabierna atardi a drenta informe di un accidente cu hende herida na Santa Helenastraat, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di un accidente unda un chauffeur a bay dal riba un auto y despues bay dal un palo di luz. Debi na e impacto e chauffeur a resulta herida. Na yegada di e ambulance nan a atende e victima na e sitio mes.



Polis y
bomberonan
a bay pa un
candela na
Alto Vista



Diasabra merdia a drenta informe di un candela patras di un cas na Alto Vista, mesora a dirigi tanto polis como bombero na e sitio.

Na yegada di e patruya a nota cu e candela di yerba ta net tras di e cas y tabata menasa esaki. Na yegada di e bomberonan mesora a inicia cu un combate directo y a logra paga esaki prome cu el a expande.

[illegible]



Dokter na warda
Oranjestad San Nicolas
Hospital Imsan
7:00 pm / 10:00 pm 24 ora

Botica na warda

Oranjestad: San Nicolas:
Paradera : Centro Medico:
Tel. 588 6638 Tel. 584 5794
EMERGENCIA 911

POLIS

Oranjestad 100
San Nicolas 104
Santa Cruz 105
Noord 107
Tip Line 11141
Brandweer 115
Ambulance 911
Hospital 527-4000
Imsan 524-8833
Warda Costa 913
Seguridad Nacional 11911
Cruz Cora 582-2219

BOTICA

Aloe 584-4606
4 Centro Medico 584-5794
Central 585-1965
Dakota 588-7364
Del Pueblo 582-1253
Eagle 587-9011
Kibrahacha 583-4908
Maria 585-8145
Di Servicio Noord 586-4606
Oduber 582-1780
Paradera 588-6638
San Lucas 584-5119
Santa Anna 586-8181
Santa Cruz 585-8028
Sero Preto 584-4833
Trupial 583-8560

UTILIDAD

Setar 117
Web 525-4600
Elmar 523-7147

FUNERARIA

Aurora 588-6699
Royal Funeral H. 586-4444
Ad Patres 584-2299
Olive Tree 584-8888

Aruba Transfer Tour & Taxi C.A.
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba
Tel: 587-8850
Tel: 280-2828
Whatsapp: 592-7024

Cas Di Cultura

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

**Fundacion Autismo
Aruba**

Irenestraat 21 Aruba
297-588-1179

**Fundacion Pa Nos
Muchanan**

Cumana 2 Aruba
297-583-4247

**Fundacion Tel Pa
Hubentud**

Wilhelminastraat 19
Aruba
297-588-6138

**Koningin Wilhelmina
Fonds**

Spinozastraat 9 Aruba
297-582-0412

Mary Joan Foundation
Sabana Blanco 8 Aruba
297-588-9999

Rode Kruis Aruba

Pedro Gallegostraat 14
Tel. 297-582-2219
Fax 588-3376

Famia Planea (SBVO)

Avenida Milio J Croes 17
B Aruba
297-588-9591
www.famiaplanea.org
famiaplanea@hotmail.com

**Stichting Fundacion
Guia Mi**

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081

Ex Rey di Nepal ta expresa preocupacion tocante estado di e pais despues di manifestacion



(AFP) - Nepal su ex Rey Gyanendra Shah a expresa preocupacion tocante e estado di e pais 4 luna despues cu manifestacion masal lidera pa hobennan a tumba e gobierno anterior.

Por lo menos 76 persona a keda sin bida durante e manifestacionnan september ultimo, cual a mira prome minister KP Sharma Oli saca y reemplasa pa ex hefe di husticia Sushila Karki den capacidad interino te ora cu eleccion den schedule pa e aña aki tuma luga.

Shah, ken a destitui den 2008 na final di un guera civil cu a dura un decada, a evita di gran manera comenta tocante e politica fractura di Nepal.

Sinembargo den un video di 12 minuut diasabra pa dia nacional di unidad, el a adverti cu “Nepal mes no lo sobrevivir.” “Casi 2 decada desde cu nos a sali for di palacio, e crisis cu e pais ta sigui enfrenta tin nos preocupa,” Shah a bisa, cu un potret di e difunto Rey Prithvi Narayan Shah, e

promete cu mando na Nepal, visible den background.

“Ayer, tabatin preocupacion cu no tin desaroyo den e pais, pero awe tin un preocupacion mas grandi cu e pais mes no lo sobrevivi mas.”

El a critica lidernan cu a faya den tende e necesidadnan di hobennan y cu esaki “a cria falta di satisfaccion entre e hubentud.”

“Busca solucion sin consensus nacional ta practicamente gasta tempo. Laga nos uni y sigui padilanti den e biahe di prosperidad.”

A corona Shah den 2001 despues cu su ruman homber grandi, Rey Birendra Bir Bikram Shah y su famia a perde nan bida den un masacre den e palacio.

Shah a suspende e constitucion y a disolve parlamento den 2005, causando un rebelion democrata den cual un insurgencia Maoista a uni na e establecimiento politico di Nepal pa organisa protestan enorme riba caya.

Pronostico di tempo



Tempo:

Awe tardi y awe nochi: parcialmente nubla y generalmente seco
Den marduga y mañan: parcialmente nubla cu un awasero pasahero

Temperatura maximo 30 grado celsius

Temperatura minimo 26 grado celsius

Indice di calor (heat index) den y rond di oranan di merdia: 31 pa 35 grado celsius

UV index: 9

Bahada di solo : 6:31 pm

Subida di solo : 7:04 am

Biento:

Moderata for di generalmente direccion oost; Forsa 3 te 4 (12 te 30 km/ora, 07 te 16 nudo). Durante di dia basta fuerte te posiblemente fuerte den rafaga; Forsa 5 te 6 (31 te 50 km/ora, 17 te 27 nudo)

Situacion general di tempo pa proximo 24 ora:

No ta spera cambianan grandi den e weer actual. Extension di e area di presion halto riba Atlantico lo sigui domina weer den region. Esaki lo sostiene un biento modera te basta fuerte, posiblemente tin bes fuerte den rafaga. Mas aleu por bisa cu humedad cu e aire transporta pa region local, lo trece temporalmente mas nubia y produci un awasero breve riba cierto partinan di e isla durante e periodo di pronostico aki.

Condicionnan maritimmo/estado di lama:

Na partinan protegi di costa: Keto cu olanan rond di 1 pia.

Na partinan zuid: trankil cu olanan di 1 te 2 pia.

Na partinan oost te noordwest di costa: Modera cu olanan alrededor di 3 pa 5 pia.

Aurora

Royal Pray

Funeral Home & Crematory

*Den Hofi Eterno lo sigui gosa di
Naturalesa su Bunitesa*

Cu profundo dolor nos ta
anuncia fayecimento di:



Glenda Elvira Tromp Kelly
*6 Mei 1959 - † 6 Januari 2026

Na number di su **Esposo:** Michael Tromp

Yiunan:

Noémi y Denrick Conradus Tromp
Mitchell Tromp y Genesis Nuñez Monsalve
Junayra Tromp y Edward Mulder

Nietanan:

Analeah Werleman
Samsara Conradus
Nova Mae Conradus

Mayornan: Mario Kelly y Aura (Laura) Kelly Paskel

Rumanan:

Grace Kelly y Julio Bruges Scot
† Maikel Marlon Kelly
Lienchi Kelly

Suegro y suegra: † Tony y Emiliana Tromp

Sua y Cuñanan:

Edwin y Aida Tromp, Rudi y Wilma Tromp, Filomena y
Arie Semeleer,
Emely y Anthony Ridderstap

Sobrino- y sobrinanan:

Aldrick, Jean-Pierre, Myron, Lupita, Gino, Eugene,
Mireille, Loraine,
Amarelys, Milienca, Jimmy, Kenny, Mickey

Madrina- y Padrinonan, Ihanan

Tantanen y Omonan

Linda y Adelís Díaz Paskel, Greta Rasmijn Paskel, † Eddie
Paskel, † Efrigenio Paskel, Meel Paskel, Robby Paskel
† Isidro y † Maria Kelly, † Ilda y Pedro Angela, † Vera y †
Facundo Kelly, † Francisca Geerman y Jacobo Croes, Aida
y Mario Kelly, Nicolaas y Marcela Kelly, Emeliano y Anna
Kelly, Tida y Hubert Dirks, Crispino y Josephina Kelly,
Theodoor y Margriet Kelly, Linda Kelly, Leonardo Kelly

Primo- y primanan

Su ex-coleganan di CMB, su bon amistadnan: Meredith
y David Britten, Denise y Gregorio De Jong, Ingrid Kelly,
Elsa Rasmijn, Vilma Wever, Lila Fernandez, Mario Quandt,
Gino Paskel, Elton Paskel, Julianne Paskel, Sharline Croes
y amigonan “Birders”

Demas famia: Kelly, Tromp, Conradus, Nuñez Monsalve,
Mulder, Werleman, Paskel, Perez, Rasmijn, Diaz, Semeleer,
Goede, Ridderstap, Concencion, Norberto, Boekhoudt,
Khalil, Rekwet, Raven

Ta invita pa acto di condolencia y entierio cual lo tuma
lugar diamars 13 di januari 2026 na Aurora Funeral Home
di 2or pa 4or di atardi. Despues lo sali pa Santana Catolico
na Paradera.

Disculpa nos si den nos tristeza nos por a lubida un of mas
number di famia

Lo tin un box disponibel cu lo por hasi un donacion pa
Casa Cuna.

Pa honra Glenda su bida nos ta pidi pa bin bisti den
colornan alegre.

Despues di despedida no ta ricibi bishita di condolencia na
cas.

Aurora

Royal Pray

Funeral Home & Crematory

*Lagrima y flornan
por seca, su
recuerdonan y tur
loke e la haci y
significa pa nos, lo
keda graba pa semper
den nos mente y
curason.
“Serca Dios mi alma
ta na paz, ta di DJ’e
mi salvacion ta bin”
Salmo 62:1*



Cu dolor na nos curason pero agradecido pa tur
locual e la nifica pa nos, nos ta anuncia fayecimento
di nos ser stima:

Juliana Henriquez-Kelly

Cariñosamente yama: “Julia” of “Julita”
*12-04-1953 - †04-01-2026

Na number di su **Casa:** Martin Henriquez

Yuinan:

Antonio Henriquez & Jouraine Giel
Angeline Henriquez & Haime Geerman

Nietonan stima:

Gianfranc Bernabela
Ashton Geerman

Mayornan: † Benancio y † Juliana Kelly-Figaroa

Rumanan:

Martina y Juan Henriquez-Kelly
† Nicolas Kelly y Linchi Kelly-Tromp
Juan y Jolanda Kelly-Arends
Maria y Oslin Dijkhoff-Kelly
Juanita Kelly y Theo Figaroa
† Jacinto y † Aura Kelly-Boekhoudt
Ovito y Shamila Kelly-Maduro
Aegidio y Dolorosa Kelly-Ridderstaat
Cresencia Kelly
† Filomena Kelly
† Emiliana Kelly

Swa & Cuñanan:

Theresita Henriquez y famia
Enrique Henriquez y famia na Merca
Maria Henriquez y famia
Franklin Henriquez

Amistadnan stima:

Sandra Suslow na Merca
Hugo Simmons
Francisca Duarte
Mona de Mey

Sobrino y sobrinanan, primo y primanan, comper
y comernan, Ihanan, su bon amigonan di Giselle
department store

Demas famianan:

Kelly, Henriquez, Bernabela, Geerman, Giel,
Figaroa, Tromp, Arends, Dijkhoff, Boekhoudt,
Maduro, Ridderstaat, Heyden.

Acto di entierio:

Diaranson 14 di Januari 2026 na Misa Santa Anna
na Noord di 2:00 PM pa 4:00 PM y despues
cremacion den seno familiar.

Enbes di flor of krans lo tin un box disponible pa
Misa Santa Anna.

Nos kier a pidi dispensa si den nos tristeza nos por
a lubida un famia of conoci.

Nos ta lamenta cu despues di entierio nos no ta
ricibi bishita di condolencia na cas.

Aurora

Royal Pray

Funeral Home & Crematory

*Vier het leven.
Wees dankbaar, ge-
niet en lach!*

Cu profundo do-
lor nos ta anuncia
fayecimento di



Ivonne Cristina Navas

* Aruba, 8 oktober 1963
† Rijswijk, 28 december 2026

Na number di su:

Mama :
Ligia

Partner:

Robert

Rumannan:

Mildred y Sealène

Swa- y cuñanan:

Na Aruba y Hulanda

Tanta y omonan, primo- y primanan na Aruba y
Hulanda, sobrino- y sobrinanan na Aruba y Hu-
landa, colega y ex-coleganan di Arubahuis.

Demas famianan na Aruba y Hulanda:

Navas, Schouwenaars, Boekhoudt, Hasham,
Kelly, Croes, Lasten y Faro.

Ta invita na acto di entierio cual lo tuma lugar
dialuna 12 di januari di 1’or pa 4’or di atardi
na Aurora Funeral Home. Despues pa Santana
Catolico na Paradera.

Nos ta lamenta cu despues di entierio no por
ricibi bishita di condolencia na cas.

Aurora

Royal Pray

Funeral Home & Crematory

*“Señor ta mi
wardador, mi’n tin
falta di nada
Den cunucu di yerba
berde e ta ponemi
sosega.
E ta hibami na awa
trankil,
Pa mi bolbe haña
forsa”.
Salmo: 23*



Nos ta anuncia fayecimento di:

Carlos David Viales Valerio

*19-10-1969 - †04-01-2025

Acto di entierio lo wordo anuncia despues.

Aurora

Royal Pray

Funeral Home & Crematory

"Mi Dios, Mi Señor, Mi
Salvador
Cu Bo amor infinito tenemi
den Bo braza
Ya no tin scuridad
Unicamente Bo Luz briyando



Cu dolor na nos curason,
nos ta anuncia fayecimento
di nos ser stima:

Viviano Jose Semeleer.

Miho conoci como "Vi".

*19 maart 1961 - † 6 januari 2026

Mayornan:

† Eduardo Semeleer
† Fortunata Semeleer-Ruiz

Na number di su:

Rumannan:

Hubert y Milly Semeleer-Nicolaas
† Rolando Semeleer
† Lidia Hart-Semeleer
Albertico y Federika Semeleer-Kock na
Hulanda
Arseno (Arie) y Filomena Semeleer-Tromp
Nelson Semeleer na Hulanda
† Ciro Semeleer

Sobrino y Sobrina:

Georgino y Giancarla Semeleer-Arends
Zayda Semeleer y Kembo Cheng
Tessa y Wesley Groenendijk-Hart na Hulanda
Mark Hart na Hulanda
Nick Hart na Hulanda
Jairhzino (Gino) y Rudiaene Semeleer-
Engelhart
Eugene Semeleer y Esther Henriette Sandries
Christy y Christine Semeleer na Hulanda
Davis y Patricia Espacia na Hulanda

Sobresobrino/anán:

Daenerys, Daemion
Tyler
Tony, Carel na Hulanda
Kathleen, Jayton na Hulanda

Tanta y Omonan den feliz memoria

Tantanán:

Sra. Vda. Cornelia Tromp-Semeleer
Sra. Vda. Ana Dijkhoff-Semeleer
Sra. Rosa y Gerd Junker-Semeleer

Primo y Primanan

Su bon bisinjanan y amigonan, mucho hopi pa
menciona y demas famianan.

Ta invita pa acto di condolencia y entierro
cual lo tuma lugar, diaranzon 14 januari 2026,
di 9or-11or di mainta na Aurora Funeral Home,
despues nos lo sali pa Santana Catolico na
Noord.

Nos ta pidi nos dculpa si den nos tristesa nos
por a lubida di menciona algun famia.

Famia ta pidi disculpa cu despues di entierro no
por ricibi condolencia na cas.

Aurora

Royal Pray

Funeral Home & Crematory

"Dios ta amor... y amor
ta Dios,
maske mi no ta na e
mundo aki, tur dia lo mi
ta banda
di boso Curazon, mi por
stens di loke Señor ta
hasi"
Salmo 33



Cu dolor na nos curason, nos ta anuncia fayeci-
mento di nos ser stima:

Sr. Marciano Hernandez

Mihor conoci como "Chany"

*24-05-1932 - †07-01-2026

Acto di entierro lo wordo anuncio despues

Aurora

Royal Pray

Funeral Home & Crematory

Lo E seka tur lágrima
for di nan wowo, I morto
lo no eksisti mas: lo no
tin nada di rou, nada di
yoramento, nada di dolo
mas, pasobra tur kos di
antes a pasa bai.
Rev. 21:4



Cu dolor na nos curason, nos ta participa
fayecimento di:

Sr. Martin Nordé

Mihor conoci como "Boy"

*01-07-1945 - †07-01-2026

Acto di entierro lo wordo anuncia despues

Aurora

Royal Pray

Funeral Home & Crematory

"Dios ta amor... y amor ta Dios,
maske mi no ta na e mundo aki, tur
dia lo mi ta banda
di boso Curazon, mi por stens di loke
Señor ta hasi"
Salmo 33



Cu dolor na nos curason, nos ta anuncia fayecimento
di nos ser stima:

Norma Sevinger

"Noi"

*03-07-1947 - †07-01-2026

Acto di entierro lo wordo anuncio despues

Israel ta firma pacto di seguridad cu Alemania, citando menasa di Iran

(AFP)—Israel y Alemania a firma un pacto di
seguridad diadomingo pa expande cooperacion
riba contraterorismo y defensa ciber, segun ofi-
cina di prome minister Israel, Benjamin Ne-
tanyahu, a bisa, citando menasanan presenta
pa Iran y su aliadonan.

"Iran y su aliadonan—Hezbollah, Hamas y e
Houthis—ta presenta un menasa no solamente pa
Israel pero tambe pa estabilidad regional y seguridad
internacional," segun un declaracion di e oficina di
Netanyahu a bisa.

"E declaracion firma awe ta ancla cooperacion cu
Alemania den tereno di ciberseguridad, contrater-
orismo y tecnologianan avansa.

Israel su enemigonan mester sa: nos wowo ta riba nan
tur tempo y den tur parti di mundo," e declaracion
a agrega.

Netanyahu y minister di Asunto Interior Aleman,
Alexander Dobrindt, a firma e declaracion.

"Mi ta kere Alemania y Israel ta partnernan natural.
Nos a coopera riba Arrow III, nos a coopera den hopi
area," Netanyahu a bisa den un declaracion separa.
E iniciativa ta formalisa un partnership amplio riba
seguridad entre aparatonan di seguridad di ambos
pais, e declaracion a bisa.

Luna pasa, Alemania a proba un expansion di un
contrato cu un balor di 3,1 biyon dollar pa e sistema di
defensa di misil balistico Arrow III, cual a ser fabrica
na Israel y desaroya cu sosten di Merca. E acuerdo,
firma originalmente na 2023, awor tin un balor di
aproximadamente 6,5 biyon dollar. Israel ta bisa cu
e ta e contrato di export militar mas grandi di e pais.

Mas trempa diadomingo, e minister di Asunto Ex-
terior Gideon Saar a tene un reunion cu Dobrindt,
durante cual el a urgi Union Europeo pa designa e
Cuerpo di e Guardia Revolucionario Islamico di Iran
como un "organizacion terrorista."

E yamado a bin mientras Iran ta mirando protestanan
mortal, inicialmente causa pa rabia tocante costo di
bida cu ta birando mas halto pero a transforma rapi-
damente den un movimiento amplio desafiando e
gobierno teocratico cu a goberna e pais desde e revol-
ucion na 1979.

Aurora

Royal Pray

Funeral Home & Crematory

Laga tur loke ta spera mi ta
bunita
Laga tur locual cu mi encontra
na caminda ta bunita
Laga tur locual cu mi laga atras
keda bunita y
Laga esakinan termina den tur
buniteza.



Ta anuncia fayecimento di

Yosely Paulina Vasquez Gonzalez

*02-04-1960 - †04-01-2025

Acto di entierro lo wordo anuncia despues

Benin ta tene eleccion un luna despues di intento di golpi fracasa

(AFP)—Benin a tene eleccion parlamentario y local diadomingo, unda ta anticipa cu e coalicion gobernante di presidente saliente Patrice Talon lo reforsa su dominio fuerte riba e nacion den West Africa, apenas un luna despues di un intento di golpi cu a fracasa.

E partido principal di oposicion, Democrats, a ser prohibi di participa den eleccionnan local, cual a tuma luga tambe apenas tres luna prome cu eleccion presidencial.

E pais cu ta conta mas cu 14 miyon habitante ta keda conmociona despues di e intento di golpi di estado mortal dia 7 di december pa parti di soldadnan rebelde, cual a ser controla pa e ehército cu apoyo di Nigeria y Francia.



Talon, di 67 aña, ken mester baha for di poder despues di su di dos termino di cinco aña, a haci yamado na tur votador pa “cumpli cu nan deber” mientras el a vota. “Awe ta e comienso di un bida mas miho,” el a bisa.

E resultadonan legislativo, cual ta anticipa pa sali den algun dia, lo defini e panorama politico prome cu eleccion presidencial den april, for di cual e oposicion tambe a ser

kita for di votacion pasobra nan no a logra e cantidad di firma necesario.

E sucesor eligi personalmente pa Talon, minister di Finanzas Romuald Wadagni, ta un faborito fuerte pa bira e hefe nobo di estado.

Durante su dies aña na poder, Talon a presidi riba un crecimiento economico fuerte, pero criticonan ta acus’e di limita oposicion politico y

derecho basico.

Oposicion ta enfrenta exclusion

Votadornan mester a yena 109 asiento den e Asamblea Nacional, unda e bloc di tres partido di Talon ta spera di reforsa su mayoria.

E coalicion tabatin 81 asiento den e parlamento anterior y e Democrats, cu apenas a participa den eleccion parlamentario, ta core riesgo di perde mas asiento e biaha aki.

Algun observador ta bisa cu oposicion por perde tur su 28 asiento, considerando e rekisito streng pa partidonan di reuni firma di 20 porciento di votadornan registra den cada un di e 24 distrito electoral di e pais pa por participa den eleccion parlamentario.

Cayanan di e capital econom-

ico Cotonou tabata calmo ora e centronan di votacion a habri, segun reporteronan di AFP.

“Mi ta orguyoso di e proceso y e organisacion, y mi ta spera cu tur cos bay bon te na fin,” artesano Claude Somakpo a bisa.

E campaña a termina sin ningun mitin grandi. Mayoria partido a scoge un strategia mas basico manera bishita cas pa cas.

“Tur medida a ser tuma pa garantisar un votacion liber, transparente y sigur. Ningun ambicion politico por hustifica violencia of pone unidad nacional den peligro,” presidente di comision electoral (CENA), Sacca Lafia, a bisa diasabra.

Corte na Hong Kong lo tende argumento di sentencia pa Jimmy Lai

(AFP)—Un corte na Hong Kong lo tende argumentonan di sentencia dialuna pa magnate di media pro-democracia Jimmy Lai, ken a ser condena di crimen di seguridad nacional cu por pone den prison pa bida largo.

A haya Lai culpable riba dos conteo di conspiracion pa comete colusion luna pasa bao un ley di seguridad nacional cu a ser imponi pa Beijing na 2020 despues di manifestacionnan grandi y tin biaha violento den e centro di finanzas Chines un aña anterior.

E magnate di medio di 78 aña

tambe ta condena di publica articulonan controversial via su Corant Apple Daily, cual awor no ta den operacion mas.

Lai ta un ciudadano Britanico y gobierno Britanico a condena su “persecucion politicamente motiva” den un declaracion mas trempan haciendo yamado pa su libertad.

Presidente Mericano Donald Trump tambe a bisa cu el a puntra lider Chines Xi Jinping pa considera libera Lai. Abogadonan lo atende tres hues di e Corte Halto riba con pa castiga Lai cuminando 10or di mainta, cu argumentonan programa pa



dura cuatro dia. E corte no a anuncia ainda e fecha di Lai su sentencia. E magnate por apela.

Hues a skirbi den nan veredicto di 856 pagina cu Lai “a keda cu resentimiento y

odio di (China) pa hopi di su bida adulto” y a busca pa “e caida di e Partido Comunista Chines.”

E ley di seguridad nacional di Hong Kong ta bisa cu ofensanan di colusion “di un na-

turalesa grave” lo resulta den encarcelacion pa entre 10 aña y bida henter. E crimen di era colonial sedicion ta carga un castigo maximo di dos aña den prison.

Por a mira casi 40 persona para pafo di e corte na West Kowloon durante weekend, cu algun contando AFP cu nan ta spera di por haya asiento den e galeria publico pa sostene Lai.

Huesnan ta anticipa pa tende argumentonan di sentencia dialuna relaciona na ocho otro persona—incluyendo seis ehecutivo di Apple Daily—ken a declara nan mes culpable como parti di e mesun caso.

Prome minister di Sudan ta anuncia regreso di gobierno na Khartoum

(AFP)—Prome minister di Sudan, Kamil Idris, a anuncia diadomingo cu gobierno ta bolbiendo Khartoum, despues di casi tres aña ta operando for di su capital den tempo di guerra, Port Sudan.

Den e dianan inicial di e guerra entre e ehército regular y e grupo paramilitar Rapid Support Forces (RSF) na april 2023, e gobierno alinea cu e ehército a huy for di e capital, cual a keda ocupa rapidamente pa tropanan rival.

Desde cu e ehército a recapta Khartoum den luna di maart aña pasa, gobierno a sigui un regreso gradual na e ciudad.

“Awe nos ta bolbe, y e Gobierno di Speransa ta bolbe na e capital nacional,” Idris a bisa reporteronan na Khartoum, primintiendo “miho servicio” pa residentenan.

Pa casi dos aña, e capital Sudanés—forma pa e tres ciudadnan Khartoum, Omdurman y Khartoum Norte (Bahri)—tabata un campo di bataya activo.

Barionan completo a ser sitia, combatidornan rival a lansa artilleria a traves di e Riu Nilo, y miyones di hende a keda desplasa for di e ciudad.

Entre maart y october, 1,2 miyon hende a bolbe Khar-

toum, segun Nacionnan Uni. Hopi di nan a encontra un ciudad cu casi ningun servicio funcional, nan casnan destrui y barionan yena cu grafnan improvisa, cual autoridadnan awor ta desenterando.

Ta calcula cu e guerra a mata dies miles di hende solamente den e capital, pero e cifra total no ta conoci, pasobra hopi famia a keda obliga di dera nan difuntonan den grafnan improvisa.

Idris a bisa cu gobierno ta comprometi pa mehora servicio di electricidad, awa, cuido di salud y educacion.

Segun Nacionnan Uni, re-

habilitacion di infraestructura esencial den e capital lo costa mas of menos 350 miyon dollar.

Den e ultimo lunanan, gobierno a tene algun reunion di gabinete na Khartoum y a lansa esfuersonan di reconstruccion.

E ciudad a experencia un calmo relativo, aunke e RSF a sigui cu atakenan cu drone, specialmente contra infraestructura.

E combatenan ta sigui den otro parti di e pais. Na sur di Khartoum, e RSF a avansa den e region Kordofan, despues di saca e ehército for

di nan ultimo bastion na Darfur aña pasa.

E conflicto a laga 11 miyon hende desplasa internamente y entre fronteranan, y a crea e crisis di desplazamento y hamber mas grandi na mundo.



Merca ta anuncia atake “di gran escala” contra Estado Islamico na Siria

(AFP) —Forsanan militar di Merca y aliadonan a haci un atake “di gran escala” contra e grupo yihadista Estado Islamico na Siria diasabra, segun e ehercito Mericano a confirma, como e respuesta mas recien na un atake luna pasa cu a mata tres ciudadano Mericano.

US Central Command (CENTCOM), cual ta supervisa e forza militar di Merca den e region, a bisa cu hopi atake tabata “dirigi riba ISIS den henter Siria”.

E publicacion di CENTCOM na X no a duna detaye specifico tocante unda e atakenan a tuma luga.

E Forza Aereo di Jordan tambe a haci atakenan dirigi contra Estado Islamico como



parti di e operacion, segun e ehercito di e pais a informa diamars.

Den un declaracion, nan a bisa cu a ataca “varios blanco...den diferente area den teritorio Sirio”.

Dos soldad y un interprete civil Mericano a muri dia 13

di december despues cu un homber arma—ken Washington a describi como militante di IS—a lansa un atake contra nan na Palmyra, un sitio cu ruinan antiguo reconoci pa UNESCO y cu anteriormente tabata bao control di e grupo yihadista.

Mas despues, e ministerio di Asunto Interior di Siria a declara cu e atacador tabata un miembro di e forza di seguridad cu tabata riba lista pa ser despedi pa extremismo. Finalmente, e yihadistanan a ser derota pa forsanan local na tera cu apoyo di atakenan

aereo internacional y otro formanan di asistencia, pero IS ainda tin presencia den Siria, specialmente den e desierto grandi di e pais.

Presidente di Merca Donald Trump tabata conoci pa su skepticismo prolonga tocante presencia di Washington den Siria, dunando orden pa e retiro di tropanan durante su prome termino, pero finalmente el a laga forsanan Mericano den e pais.

E Pentagono a anuncia na april cu Merca lo reduci e cantidad di personal militar na Siria na mita den e proximo luna, mientras enviado special di Merca pa Siria, Tom Barack, a bisa na juni cu Washington lo eventualmente reduci su base militar den e pais pa un so.

Oposicion Ugandes ta converti bandera nacional den simbolo di protesta

(AFP) — Centenares di hende a grita di emocion ora lider di oposicion di Uganda a pasa door di un manifestacion caminda e multitud tabata bula e bandera nacional cu a bira un simbolo politisa na porta di eleccion presidencial siman pasa.

Analistanan ta bisa cu e ta casi un conclusion predici cu presidente Yoweri Museveni, di 81 aña, lo gana un di siete termino den e votacion di diahuebs, considerando su control casi total riba e aparato estatal den e pais den West Africa.

Pero su oponente, Robert Kyagulanyi di 43 aña, mas conocido como Bobi Wine, a pinta e eleccion como un voto di protesta y a transforma e bandera nacional den un simbolo di resistencia.

Polis a lansa un advertencia luna pasa contra uso di e bandera “den un manera casual y inapropia”.

Segun r Oficina di Derecho Humano di Nacionnan Uni y otro observadornan, partidario di Wine a enfrenta intimidacion frecuente pa forsanan di seguridad durante e campaña.

Pero e bandera ta “e unico arma cu nos tin”, carpinte Conrad Olwenyi a bisa durante un protesta di Wine pafo di Kampala e siman aki,



caminda a hisa e simbolo nacional.

“Nos no por bringa contra seguridad, pasobra nan tin arma. Nos solamente tin e bandera”, el a bisa. “Pero si nan tira bo ora bo tin e bandera, nan ta tirando riba e pais”.

Winnie Byanyima, esposa di e lider di oposicion prisionero Kiiza Besigye, a bisa cu Wine y su partidario ta usando e bandera como simbolo di unidad nacional.

“E reaccion di presidente Museveni ta bisa cu: boso no por usa e bandera”.

“Esey ta nifica cu, cu e accion aki, nan a deslegitima presidente Museveni, paso-

bra awor e ta purbando di usa forsa pa stop hende di carga e bandera nacional. Ken ta haci algo asina?”

‘Reclama patriotismo’

E bandera di Uganda—crea ora e pais a logra independencia for di Gran Bretaña na 1962— tin rayanan preto pa representa Africa, geel pa su solo, y cora pa representa hermandad Africano, cu un gruya shinishi corona como simbolo central.

Den eleccion di 2021, e partido National Unity Platform (NUP) di Wine a adopta baret cora como simbolo, pero gobierno a declara esaki ilegal, alegando cu e tabata parti di e uniform militar, y a usa e decision pa hustifica redada-

nan na e oficina di partido.

E bandera ta un alternativa inteligente y un manera di “reclama patriotismo”, segun experto riba Uganda, Kristof Titeca.

“El a tuma gobierno pa sorpresa, y esaki ta pasobra nan a cuminsa e represion”, el a bisa AFP.

Manera den hopi pais den West Africa, tin leyman cu ta regula con e bandera nacional por ser usa, pero anteriormente casi no tabata aplica esaki den Uganda.

“E ta muestra panico”, caricaturista reconoci Jimmy Spire Ssentongo a bisa na AFP.

“Mi no ta kere cu nan ta me-

nasa door di mal uso di e bandera. Nan ta menasa pa visibilidad di apoyo pa NUP”, el a agrega, bisando cu mientras Museveni ta birando mas bieu y ta acercando 40 aña na poder, “espacio pa libertad di expresion tambe ta reduciendo”.

“Tur hende tin derecho di usa e bandera nacional, pero e ta depende den cua contexto nan ta us’e”, Israel Kyarisiima a bisa, ken ta coordinador hubenil nacional di e partido National Resistance Movement di Museveni. “Mi ta kere cu e oposicion ta politisa”.

Servicio di seguridad a ser acusa repetidamente pa partidario di Wine di dirigi atake riba hende cu ta carga e bandera den protesta. Wine a urgi simpatisantenan den su mensahe di Pasco pa “defende cu alquier hende cu ser ataca pa carga e bandera”.

Y e menasanan di polis no a stop partidarioman di Wine di sigui bula e bandera den protesta.

“Awor nos tin algo cu por muestra nos unidad como Ugandes, y nan ta trata di criminalisa esaki”, Ruth Excellent Mirembe, di 25 aña, a bisa bulando un bandera na e protesta di e siman aki.

Purba di stop su uso ta “opresion den su forma mas halto”, el a bisa AFP. “Esaki ta representa nos como Ugandes”.